

續弘簡錄元史類編

續弘簡錄元史類編卷三十七

皇清詹事府少詹事仁和邵遠平戒山學

旌德一

忠節

石珪

李伯溫

附守正守忠

耶律忒末

子天佑

攸興哥

任志

梁直脂魯華

抄兒

杭忽思

阿散真

庫祿滿

鄭義

扎忽帶

張萬家奴

月里麻思

附唐慶

楊傑只哥

趙阿哥潘

趙匝刺

伯八兒

鞏彥暉

合刺普華

綦公直

劉天孚

蕭景茂

周鏐

附謝一魯

聶炳

附明安達爾

俞述祖

丑間

附馮三

闕文興

野峻台

李羅帖木兒

卜理牙敦

附上都

星吉

潮海

附黃紱斗元

胡黃雲

李黼

魏中立

泰不華

樊執敬

桂完澤

王簡

子相

陳君用

彭庭堅

劉溶

子健

汪澤民

劉畊孫

褚不華

王士元

卞琛

石珪泰安新泰人世以耕讀爲業體貌魁偉倜儻不羈金主遷
汴兵戈四起珪率少壯負險自保與滕陽陳敬宗結義山東宋
將鄭元龍以兵來攻珪敗之于毫陽乘勝入盱眙會宋賈涉誘
殺漣水軍統轄季先人情不安衆迎珪爲帥稱太尉太祖遣使
與宋議和珪令麾下劉順直抵尋斯干城入覲太祖慰勞順且
敕珪曰如宋和議不成吾與爾永結一家之好吾當遣汝順還
告珪心感服日夜思降未幾宋果渝盟珪棄其妻孔氏子金山
仗劍渡淮宋將追之曰太尉廼當完汝妻子珪不顧宋沉其妻
子于淮珪遂率順來歸木華黎承制授珪濟兗單三州總管後
金棄東平珪與嚴實分城內南北守之收輯濟兗沂勝單諸州
加山東諸路都元帥移治曹州與金將鄭從宜連戰數晝夜糧
絕援兵不至軍無叛意珪臨陣馬仆被擒囚至汴金主壯其人

誘以名爵欲使揖珪憤然曰吾身事大朝官至光祿復能受他國封邪假我一朝當縛爾以獻金主怒蒸殺于市其麾下立社究州祀焉子天祿襲封與宋將彭義斌金將武仙戰屢捷後破考城圍歸德從攻斬黃皆功居首改征行千戶

卒伯溫大寧義州人守賢之孫敬之子也長兄惟則官平陽征行萬戶次伯通太祖九年錦州張致叛木華黎命擎之大戰城北死焉伯溫行平陽元帥府事鎮青龍堡專任東征聞平陽已陷弟守忠被執選驍勇拒守久之金兵盡銳來攻守卒多夜遁李成問水門導敵入伯溫登堞樓謂左右曰吾兄弟仗節擁麾受方面之寄今不幸失利當以死報國吾弟已被執我不可再辱汝等宜自逃生卽拔劍殺家屬投井中自引刀植柱刺心而死金兵登樓見其抱柱如生無不嗟嘆子守正幼嘗質於木華

黎後爲平陽守活俘獲甚衆以功授河東南路兵馬都元帥太
宗二年上黨晉陽合兵攻汾州將陷守正以義赴援衆寡不敵
別遣老弱百人曳柴揚塵多張旗幟敵懼遂解去汾人持牛酒
迎犒曰幸公完是州德甚大願奉是州以從隰州叛守正往擊
之中矢傷足歸創甚會金將完顏合達攻平陽守正裹瘡戰歿
大帥以其兄守忠襲金將紇石烈真襲擊平陽行營守忠出援
次高梁師潰入城副帥夾谷常德潛獻門納金兵城遂陷守忠
被執械至汴誘使降守忠罵之語惡金人怒置鐵籠中炙死
按李守賢傳云金大安初守賢暨兄庭植弟守正守忠從兄伯
通信溫歸欽于木華黎太祖即命庭植爲崇義軍節度使守賢
爲錦州觀察使守忠爲都元帥守河東是伯溫與守賢守正皆
兄弟而本傳云伯溫爲守賢之孫贊之子且以守正爲伯溫之
子外證實其即其年與事
考之有不待辯而自明者

耶律忒末契丹人父正哥仕遼爲都統遼亡不屈節夫婦俱死

金主憫其忠授武末爲都統太祖九年金主徙汴武末以其子
天祐率衆三萬來歸授帥府監軍從元帥史天倪略趙州平棘
樂城元氏栢鄉贊皇臨城等縣又從太師木華黎收邢洺磁相
懷孟諸州有功授洺州元帥引兵臨澤潞降其民六千餘戶進
河北西路安撫使致仕居真定天祐襲職金降將武仙據真定
叛殺天倪武末父子夜踰城出會天倪弟天澤還自北京遇諸
滿城合諸軍南與賊戰遂復真定朝命以天祐鎮趙州仙復犯
真定武末與其妻石抹氏及家孥之在真定者皆陷仙遣其僕
持書誘天祐曰汝能誅趙州官吏以降當活汝父母不爾盡烹
之武末密令其僕語天祐曰仙賊狡猾汝所知也毋以我故墮
其機竅以虧忠節且忠孝難兩全汝能固守不失國家大計我
甘刀鋸如飴矣天祐慟哭以賊書示天澤并述父言天澤曰王

陵之事照耀史冊汝能遵父命忠誠許國功不在王陵下天祐
乃趨還趙壁率衆殊死戰仙怒盡殺其家一十八人及戰仙兵
屢挫監軍張林密搆仙黨啓關納賊天祐倉皇巷戰身被十餘
創斬關出會天澤兵夾擊殺林加趙州安撫使以傷憊解官卒
冊曰子之能仕父教之忠死雖慷慨氣自從容機穽寧蹈
刀鋸如館一十八人盡節無虧

攸與哥勸海人世農家好武斷鄉井金末避地大寧會蒙古兵
至山保高州富庶寨射獵以爲食木華黎率兵攻寨寨破奔高
州及兵圍城下令曰能斬攸與哥首以獻者受上賞民皆獲生
守者名謂曰汝奇男子吾寧忍遽斷汝首汝其往降乎不則一
城生靈無噍類矣與哥乃折矢出降諸將怒欲殺之木華黎曰
壯士也留之爲吾用俾隸麾下從攻通州一夕造巨礮雲梯各

數十附州城州將懼乞降以功太祖賜名哈刺拔都魯從略燕
南爲先鋒至大名金將登城督戰興哥射之中左目其部將開
門南奔追殺殆盡授河東北路兵馬都元帥鎮太原時太原新
破至則下令軍中凡俘獲人口有親者聽贖無貲者官爲贖民
得完聚者衆既引兵援隰州金將乘虛擣太原西門俘獲其妻
子興哥聞之徑趨西門奪之還時太原諸邑皆平唯石家昂及
孟州陵井寨忻州清泉寨爲唇齒未下興哥兵將至陵井遣卒
叩寨門詐曰納糧芻守者弗悟門啓竟入衆驚潰二寨遂平會
姦人夜獻太原東門於武仙仙引兵入諸將自城外呼曰興哥
當早出對曰真定史天倪平陽李守忠隰州田雄皆失守矣我
又棄太原將何面目見主上乎家屬任公等俘吾誓與城同存
亡遂歿于陣

任志潞州人木華黎略地潞州志首迎降俾充元帥收輯山寨每與金兵戰輒勝金擒其長子如山以招之曰降則爾子得生不則死志曰我爲大朝之帥豈愛一子親射其子殪之木華黎嘗召諸將議事志亦預召道經武安其縣已反志死之其子存襲元帥職金將武仙攻潞州存亦戰死詔有司廩給其妻孥仍賜第居之世爲潞州長官

槩直脂魯華蒙古克烈氏初以所部從太祖征乃蠻西夏有功下金桓州掠監馬萬匹軍勢大振已破遼東西諸州唯東京未下獲金使遣往諭之魯華曰東京金舊都備嚴而守固攻之未易克以計破之可也請易服與其使偕往說之彼將不疑俟門啓繼以大軍則事濟矣卒如其計後徇地河北攻大名中流矢卒子撒吉思卜華嗣將父軍金徙都汴立河平軍于新衛以自

罔恃爲北門攻之不拔太宗自白坡濟河而南皇子拖雷由峭石灘涉漠而北上華渡自河陰至鄭金主勢蹙出奔師遂入據之金主自黃陵岡渡河謀復汴與金將白撒戰于白公廟五日夜俘斬萬計金主竄歸德卜華躡其後薄北門而軍左右皆水金將夜砍營入腹背受敵一軍皆陷太宗命大臣料民分封功臣卜華妻楊氏自陳曰吾舅及夫皆死國事而賞不及何以爲効忠者勸乃賜新衛民二百戶

抄兒阿速氏世居汴梁陽武縣從太祖收附諸國有功繼從伐金歿于陣子抄海從征河南山東亦歿于陣子別帖將父軍從皇子忽哥赤西征大理復歿于陣子阿必察至元五年授蒙古千戶從開襄陽既渡江奪陽羅堡以功進蒙古軍總管管領左右翼兩萬戶軍旣下廣德從平章阿里海牙征海外諸國鼓戰

船進奪岸口亦卒于軍四世皆以身殉國云

杭忽思阿速氏主阿速國太宗兵至其境率衆降遂命守本國
尋命選阿速軍千人及其長子阿增赤扈駕留宿衛遣杭忽思
還國道遇敵兵戰死敕其妻外麻思領兵守國外麻思躬擐甲
冒平叛亂以次子按法普嗣國阿增赤從憲宗征西川軍釣魚
山屢敗宋兵阿里不哥叛從征至寧夏與叛軍遇率先赴敵矢
中其腹不懼又從征李璫二十餘戰累功授千戶同增不台領
兵南征下五河口沿江諸郡戍鎮巢軍宋降將洪福以計殺之
世祖憫其死特賜鎮巢降民千五百三十九戶命其子襲職

新編云洪福本夏貴家童積勞知鎮巢軍貴既降元遣人招之
福不聽貴誘執殺之又云元兵南下鎮江降福時陷城中尋以
計殺洪福或從陷而復自拔出者耶 按

阿散眞阿速氏初憲宗以兵圍阿兒厮蘭之城其父名阿爾思

蘭者偕阿散真迎謁軍門帝賜手詔命專領阿速人且留其軍之半餘悉遣還俾鎮本境以阿散真備宿衛道過闊兒哥叛軍力戰死之帝遣使裹其屍還葬阿爾思蘭請曰臣長子死不能爲國宣力有次子捏古來願陛下用之北至帝見其驍悍命從征烏蠻屢建功後從伐宋中流矢亦死于軍

庫祿滿遼人本述律氏後訛爲石抹氏祖石抹也先

一作石抹阿辛

太祖時爲北京達魯花赤戰死蠡州父查剌兼真定達魯花赤

事詳功臣傳

庫祿滿早歲襲父職與從弟度剌皆英勇善鬪領舊所

號黑軍者盡勇猛士每戰必居前鋒奔突敵壘爲諸軍倡憲宗

時從攻襄樊創立雲梯大呼先登度剌爲守陴者所殺庫祿滿

憤不顧身奮長戈衝其堞城遂破中統二年李璫反從攻濟南

主帥素壯其勇令先登飛矢中額如蝟遂死城下

按元本第一

石抹也先傳并載其子查剌而一百五十二卷又作石抹阿辛傳音字相訛以致重出今刪去前段

鄭義河間人少以材勇稱性豪俠好結客初事太宗爲山東路

都元帥兼景州軍民長官從伐金戰于歸德死焉弟德溫襲從

攻徐州冒刃陷陣而死弟江代

鐵輔志作子澤江皆有戰功顯於時

世祖北征授

武衛親軍都指揮使至元八年從攻襄陽亦歿于陣

札忽帶蒙古人祖字罕太宗時爲鎮西行省領軍徇河中潼關

秦鞏諸城授左翼萬戶從都元帥塔海紉十出征歿于陣父忽

都襲憲宗南征從畧巴州渡馬湖江破宋兵于老君山下至元

初授蒙古漢軍總管從都元帥百家奴攻宋淮西卒軍中札忽

帶嗣爲千戶從取重慶宋守將張珪遣勁旅數千出挑戰札忽

帶力擊破之大軍圍瀘州數月未下軍中糧盡札忽帶倡勇登

城與瀘兵搏戰死

張萬家奴父札古帶爲河東南北路船橋隨路兵馬都總管萬戶從西征下興元圍嘉定歿于軍萬家奴入朝世祖授以父官從攻瀘州大敗宋軍殺傷過半繼攻重慶破朝陽寨圍嘉定柵平康泰和懷遠諸寨分兵戍守時諸將攻瀘州失利乃詣闕請自任以攻取之效遂率舟師百五十艘自桃竹灘至折魚灘分守江南約日進攻先據神臂門爲梯衝登城斬關入遂拔之既討平西南彝進副都元帥將四川兵征烏蠻時雲南諸蠻皆叛殺掠人民州郡莫能制遂以兵勦其衆至元二十年詔從征緬戰死雲南王命其子保童將父軍再征緬入太公城有功襲副都元帥後出師至甘州山丹城亦戰死

問曰英英諸公累世殉國不媿將門忠孝兩得彼有懦夫臨鋒辟易胡不觀斯翁有生色

月里麻思乃馬氏初太宗命與斷事官忽都那同署後同阿木魯充達魯花赤破南宿州太宗十三年使宋議和從行者七十餘人月里麻思曰吾與汝等奉命南下楚人多詐倘遇變當死毋辱君命及馳抵淮上宋將以兵脅之曰爾命在我生死頃刻間若能降官爵可立致不則必不汝貸月里麻思曰吾持節南來以通國好反誘我以不義有死而已言辭慷慨守者知其不可奪乃囚之長沙飛虎寨三十六年而死世祖深悼之官其子忽都哈思日給糧食其家至元十八年忽都哈思以招討使將兵征日本死于海同時有唐慶者太宗命爲國信使往金令別帝號稱臣金主不聽慶以語侵之夜半金飛虎卒申虎等入館舍殺慶及其弟山祿與祿并從行者十七人

同日卿命出使貴在不辱慮於未然臨事可復爵不能要

威不能屈方之子卿歷年猶速

楊傑只哥燕京寶坻人世業農小有勇略太祖略地燕趙率其屬來降從攻遼左及定西夏諸部有功太宗元年還攻信安城四面阻水其帥張進久不降傑只哥曰彼恃巨浸我師進不得利退不得歸不若往說之進見其來怒曰吾已斬二使汝不懼死邪傑只哥從容言曰今齊魯燕趙地方數千里郡邑間風納欵獨君恃此一城內無軍儲外無援兵亡可立待爲君計不如請降可以保富貴而免死亡進默然曰姑待之凡三往乃降師次徐州阻河不得濟傑只哥偵知有賊操舟伏草澤中夜率勁卒憑河擊之奪其舟衆畢渡獲河南諸郡降人三萬餘戶進攻州城金將安國用拒戰傑只哥率騎突入陣中截擊大敗之復從阿朮魯攻歸德麾諸將縛草作筏渡濠抵城下梯城先登拔

之諸軍由是進攻得五州十縣宋兵至已登歸德城傑只哥拒戰敗走之率舟師追擊轉戰中流溺死

趙阿哥潘土波鬼烏思藏掇族氏始附宋賜姓趙世居臨洮富甲諸羌父阿哥昌仕金官熙河節度金亡以衆來歸皇子闊端鎮西土奏授疊州安撫卒于官阿哥潘從憲宗伐蜀以破大安功最授同知臨洮府事斬朝天關乘嘉陵江至閬州攻利州敗宋師于潼川擊宋制置使劉雄飛于青居山進逼成都略嘉定平義昌太平寨大小五十餘戰皆身先陷陣中統建元還鎮臨洮歲饑發私廩以賑貧乏給民農種粟二千餘石蕪菁子百石郡當孔道傳置旁午以私馬充驛騎出牛羊千口代民輸世祖聞之詔京兆行省圖其直辭曰豈敢以私惠邀公賞卒不受以軍事赴青居山道爲宋兵所邀不屈死賜諡桓勇

趙匣刺未詳何處人始以父任爲千戶世祖中統三年守東川
宋夏貴以兵侵虎嘯山元帥欽察遣匣刺率兵往禦貴敗走宋
劉雄飛以兵犯青山匣刺與戰于都尉壩敗之從攻大良坪
宋咎萬壽運糧至渠江之鵝灘匣刺邀奪之宋兵大敗匣刺亦
被三創矢鏃中左肩不出元帥惜其驍勇取罪囚二人刳其肩
視骨節淺深知可出卽鑿其創拔鏃出之神色不稍動至元中
爲東川路先鋒尋兼京兆延安兩路新軍戍東安虎嘯山兩城
宋楊立以兵謁糧至匣刺率所部兵戰于三重山立敗走棄糧
千餘石盡收其甲仗旗幟而還從攻釣魚山之沙市匣刺乘夜
蟻附而登殺守兵燒其積聚又擊敗宋將張珏兵于武勝軍旣
率舟師圍重慶宋將趙安勒兵出戰匣刺迎擊夜二鼓敵衆大
潰行院上其功未報而疾作乃遣往瀘州治疾瀘州復叛匣刺

與疾出戰爲所獲與從者二十人皆死之

伯八兒合丹氏祖父從太祖征伐皆有功世祖卽位以伯八兒爲舊臣子擢萬戶命領諸部軍屯守欠欠州至元十二年親王昔里吉脫鐵木兒叛奔海都伯八兒以聞且願提兵往討未得命爲彼所襲死焉脫鐵木兒取其二子八刺不蘭奚分置左右居歲餘八刺陰結其近侍圖復仇謀泄南奔追執之詰曰我遇汝厚甚願汝反爲逆邪八刺曰汝背叛君上害我父掠我親屬我誓欲殺汝以報君父仇今力窮被執從汝所爲不稍屈以鐵搥碎其膝終不跪與弟不蘭奚同被害

華彥暉易州人與兄彥榮俱以武勇稱初彥榮以百夫長隸千戶何伯祥麾下累有戰功後請老以彥暉代伯祥奉命南伐彥暉遂破襄陽光州統拔滁壽二州已攻泗州諸將夜集城下爲

塹水所阻黎明無敢渡者兩軍交射如雨彥暉披重甲徑突眾隨之至晡得其外城尋登其月城彥暉將下顧伯祥失所在乃反求之敵追襲彥暉力戰翼以出兵次武昌宋援兵四集有舟數十來挑戰彥暉逐之入湖中伏出被圍數匝左右莫能近彥暉矢盡身被重傷度不免遂投水中敵援之出載詣江州見宋官不屈問以事不對竟死

合刺普華回鶻人伯父爲其國相亡歸太祖父岳璘帖木爾多戰功授河南軍民都達魯花赤所得上方賞賚悉輦歸故郡散親友且盛陳漢官儀衛以激厲之國人多相率來附合刺普華幼侍母與敦氏居益都嘗嘆曰幼而不學有不墮吾宗者乎父聞而奇之俾習經史記誦精敏世祖中統二年李璫叛其母攜季子脫烈普華避地登萊間音問隔絕號泣徹晝夜繼從叔父

撒吉思平賊卒奉其母歸撒吉思深器重之言於世祖名給宿衛嘗以事至益都於四脚山下置廣興商山二冶以勞授商山鐵冶都提舉未及代以職讓其弟時大兵南伐餽運繁興被選爲行都漕運使江南平上疏言親宗室禮大臣以存國家之體與學校獎名節以勵天下之士正名分嚴考課以定百官之法通泉幣節貢獻以厚生民之本又言江南新附宜招舊族力稽通商弛征薄入以撫馴其民不則恐上煩宵旰之慮帝多采用其言時阿合馬專政以漕糧漂溺虧耗責償舟人合刺普華伏闕抗言量之奇贏出於元降而水道之虞非人力所及料且彼雖貧家不足償苟朝廷必不任虧損臣請獨當其辜詔勿治阿合馬徇之出爲寧海路達魯花赤歷改廣東都轉運鹽使劇賊賊曹喜僞僞號聚衆至十萬合刺普華與宣慰使白佐分兵搃

之未幾有丞峻都督兵征交趾屬護餉道北至東莞博羅界遇
歐賊橫絕石灣鋒銳甚合刺普華且戰且行矢竭馬創徒步格
鬪爲所執賊欲奉爲主不屈遂遇害贈戶部尙書諡忠愍軍中
往往見其乘雕督戰云孫傑哲篤第進士官吏部尙書以文學
政事稱於時語見呂思誠傳

綦公直益都樂安人世業農至元九年爲沂莒膠密寧海五州
都城池所千戶督造征日本戰船于高麗時米未下世祖知其
勇遣使召見俾領兵同行荆南招討司事抵峽州青草灘霖雨
不進還屯玉泉山率兵三千攻安遠下寨破之及襄陽下命領
鄧州光化唐州漢軍及郢復熟劄軍九千人從諸軍南伐至江
西宋軍突出逆戰公直敗之追抵城下遂踰濠焚其樓櫓隆興
降已令第三子忙古台攻梅關破淮德山寨入廣東至南海皆

下時伯延伯答罕禿忽魯叛于西夏公直率軍討平之累授萬戶將屯肅州兵移鎮別失八里之地諸王海都叛侵別失八里公直進戰洪水山敗之追擊漸遠援兵不至第五子瑗力戰死公直與妻及忙古台俱陷於敵

冊曰臨陣爭雄死生呼吸礮飛矢流欲避不及懦夫貪生士卒喪氣奮勇陷敵寧非節士

劉天孚字裕民大名人由中書譯史歷知許州許屬襄城與葉縣接壤其南爲淇河襄民食滄鹽葉民食解鹽刻石河南岸爲界葉令有貪者陰徙石於北二里誣其民食私鹽逮治百餘家兩縣圖辨不已天孚爲考其原界移石故處而葉令被罪去歲旱蝗天孚令民出捕俄羣鳥來啄蝗爲盡及秋麥熟時有青蟲如蠶食麥民相視愁歎忽生大華蟲盡嚼之許人立碑頌其事

仁宗延祐中遷知河中府視事甫兩月會周王和世琜出鎮雲南道經陝西行省丞相阿思罕意不平謀舉兵向闕先入河中坐府治方號令諸軍天孚佩刀直前衆避之不得進顧謂幕僚曰吾家本微賤荷朝命至此今不幸遭大變何忍從逆而負上恩哉且與其辱於逆賊之手吾寧蹈河以死遂拂衣出時天寒河水方堅天孚拔所佩刀斫冰開北望再拜已脫衣帽岸許竟投水中死追贈彭城郡侯諡忠毅

蕭景茂漳州龍溪人性孝友家貧力農以謹厚信於鄉里後至元四年南勝縣民李志甫作亂掠龍溪景茂與兄佑集鄉丁拒之據觀音山橋險與賊戰敗被執賊使拜曰汝賊也何拜欲脅之降曰國家何負汝而反汝族汝里何負汝而坐累之我生爲大元民死作隔州鬼豈從汝爲逆者

隔州其所居里也

賊相語曰官軍

將吏至我寨皆梗靡求生未有若此倔强者留之祇取辱耳遂縛於樹縛其肉使自啖景茂且嚼且罵賊以刀決其口至耳旁尚罵不絕聲而死朝命褒之仍給錢以葬

即曰人生天地數豈能逃三日寒疾死等鴻毛視彼俠烈秦岱爭高慷慨赴義萬古爲昭

周鏜字以聲瀏陽州人篤學通春秋登泰定四年進士官大冶縣尹抑豪強惠飭獨鏜狀若阡儒而毅然有威不可犯會修功臣列傳擢國史院編修官出爲四川儒學提舉便道還家至正十一年羅田徐壽輝盜起號紅巾攻陷蘄黃諸郡瀏陽無城守盜至民皆驚竄鏜告其兄弟使遠引自謂我受國恩脫不幸必死毋相累也賊至得鏜欲推爲主鏜唯瞋目厲聲大罵賊知不可屈殺之同州謝一魯字至道鄉貢士爲石林書院山長賊

陷潭州一魯奉母走匿岩谷間官兵復郡邑亡者稍歸乃還理
故業俄而賊復至生縛之一魯罵賊甚厲舉家皆遇害

聶炳字韞夫江夏人元統元年進士授同知平昌州事至正十
二年遷知荊門州纔半歲紅巾賊至荊門不守炳出募士兵得
衆七萬復其城又與四川平章咬住恢復江陵縣旣而賊勢復
振僞將俞君正合兵來攻炳率孤軍晝夜血戰援絕城陷被執
極口罵不絕賊以刀抉其齒盡乃支解之時有明安達爾字
士元唐兀氏炳同年進士也爲潛江縣達魯花赤賊至率勇敢
拒之立營蘆洲比城陷鬪死舉家殲焉

俞述祖字紹芳慶元象山人由翰林書寫授國史院編修出爲
沔陽府推官至正十二年斬黃賊丁普郎陷武昌進攻沔述祖
領民兵守綠水洪并力捍禦相持十餘日力不支爲賊所執械

至僞主徐壽輝所誘之降子方五歲亦被縛曰不降將殺是述祖厲聲曰我躬不閱遑卹我後何不速殺是賊殺其子述祖謾罵不已遂支解之追贈象山縣男錄其從子爲後

丑閻字時中蒙古氏登元統元年進士第累官京畿漕運副使出知安陸府至正十二年徐壽輝僞將魯法興犯安陸時丑閻募兵得數百人帥以拒賊敗賊前隊乘勝追之賊自他門入亟還兵城中火起軍民潰計不可遏乃歸服朝服出坐公堂賊至排之下使拜不屈且怒罵賊首不忍害拘之明日又逼其從亂丑閻疾呼曰吾守土臣寧從汝賊賊怒以刀斫其左脇斷而死復取布囊盛其屍昇置其家妻侯氏出大哭且列酒肉滿前渴者令飲饑者令食以紿賊使不防已至夜自經事聞贈丑閻河南行省參政侯氏寧夏郡夫人表其門曰雙節 有馮三者湖

廣省役卒也素不知書省署遭寇陷皂隸輩悉起剽殺爲盜拉
三同行辭曰賊名惡我等豈可爲衆強之終弗聽怒將殺之三
遂唾罵賊乃縛諸木昇以行而刳其肉三益罵不止抵江上斷
其喉委去其妻隨三號泣俯拾刳肉納布裙中伺賊遠收其血
骸脫衣裹之投江死

閩文興建康人嘗從軍漳州爲招討司知事漳州陳吊眼盜起
有衆數萬連營五十餘寨元帥完者都遣文興討之賊乘高據
險人莫敢進文興藝薪焚其營多斬獲賊走入畚洞已擁衆攻
漳州文興竭力捍城身經數十戰死于陣妻王氏被掠義不受
辱乃縊賊口俟吾葬夫後卽汝從也賊許之得脫負屍還積薪
焚之火既熾氏自投火中死元統二年封文興爲英毅侯王氏

爲貞烈夫人廟號雙節

列女傳載王
氏作王魏魏

開曰臣死爲國妻死爲夫綱常已任聖賢之徒匹休令節
同心共孚出於巾幗尤足立懦

野峻台

志作趙野
字峻台

雍古部人中書右丞趙世延子也由西臺御

史轉黃州路總管湖廣旣陷朝廷察其材擢四川叅政命與平

章咬住同討賊咬住軍五千人乃分銳卒八百使將之爲前驅

攻克巴東時歸峽等州皆爲賊守野峻台破賊江上斬溺無算

巴東歸峽平進拔江松滋乘勝趨江陵賊出陣清水門鏖戰

至夕賊方退乃據其門埃援軍至黎明賊出戰三時頃咬住軍

止百步外不救賊飛槍刺之死追封涼國公諡忠壯

李羅帖木兒字國賓高昌人由宿衛補官選爲襄陽路達魯花

赤至正十一年汝穎盜起鄆縣人田端子等亦聚衆殺官吏字

羅將民兵捕緝之十五年徐壽輝兵陷襄陽字羅領義兵二百

人且戰且引前赴沔陽乞師得五千人乃趣還襄陽賊方駐楊湖港乘其不虞擊之獲船二十七艘進次潛江兵未食而賊大至與戰抵暮被重創急麾兄子馬哈失力使去曰吾以死報國汝無留此兄子泣曰願以死從旣而孛羅被執罵賊遇害馬哈失力帥家奴求其尸復與賊戰歿于陣舉家死者二十六人卜理牙敦北庭人官山南道廉訪使治中興地爲江漢藩屏每按臨所部威惠翕然至正十二年勦賊犯中興卜理牙敦引挽強士禦之射賊多死賊稍却明日復擁衆來襲東門力戰被執不屈死又明日賊且奄至前中興判官上都統兵出擊之旣而東門失守倉皇反關力屈亦被執誘使降上都大罵賊怒剗其腹而封其肉

星吉字吉甫河西人少給事仁宗潛邸以精敏稱英宗至治初

授中尙監改右侍儀使累遷南臺御史大夫時承平日久內外
玩愒星吉獨持風裁湖東僉事三寶住儒者也性廉介所至搏
食猾御史有以私請者每拒不納因誣以事劾之章至星吉怒
曰若人之廉孰不知之乃敢爲是言邪卽奏杖御史而白其誣
執政者惡之移湖廣平章威順王歲出獵病民又起廣樂園多
萃巨賈網大利星吉至謁王王啟左扉召之入星吉引繩牀坐
王中門大言曰吾受天子命來作牧非王私臣安得由不正之
道入閤者懼入告王王命啟中門旣入責王曰王帝室之懿古
所謂伯父叔父者也今德音不聞而騁獵宣淫賈怨於下恐非
所以自貽多福也王急握手謝紅巾盜起會僚屬計事或曰有
鄭萬戶老將也宜起用之星吉乃命募土兵完城池修器械悉
以其事屬鄭賊遣其黨二千來約降星吉與鄭謀曰此詐也然

御降不可宜審而受之及期果得其情盡殲焉械渠魁數十人
以俟命俄有旨名爲大司農同僚受賂賂且嫉其功因誣鄭罪
而釋其所械者明日賊大至內外響應武昌遂陷時至正十二
年正月也星吉旣入見具陳賊始末狀帝大喜時宰不悅奏爲
江西平章令守江州時江州已陷賊將趙普勝據池陽太平間
官軍止三百人賊號十萬衆皆欲走星吉曰畏賊而逃非勇也
坐而待攻非智也汝等皆有妻子財物縱逃其可免乎乃貸富
人錢募兵衆爭赴一日得三千人具舟直趨銅陵克之進攻白
馬灣賊大敗分兵蹕之抵白潛奪船六百艘軍聲大振遂復池
州命諸將分道討賊復石埭進據清水灣伺者告賊艦至自上
流順風舉帆衆且數十倍諸將失色星吉曰無傷也風勢盛彼
倉猝必不得泊但伏橫港中俟過而擊之無不克矣

風怒水駛賊奄忽過乃舉旗張帆鼓譟薄其舟風反爲我用又大破之時賊久圍安慶聞信遽燒營去遂由湖口克江州留兵守之命王惟恭柵小孤山星吉自據鄱陽口綴江湖要衝圖恢復時湖廣已陷江西被圍淮浙亦多故卒無繼援者日久糧益乏士卒咸困或曰東南完寶盍因糧以圖存星吉曰吾受命守江西必死於此衆莫敢復言有頃賊乘大艦四集取兼葦編大筏塞上下流縱火焚營軍力且盡星吉從子伯不華與親兵數十人死焉星吉猶堅坐不動忽流矢中其要害昏仆地賊素聞其名昇至密室至旦始獲賊羅拜饋食星吉斥之七日不復食仍自力而起北面再拜曰臣力竭矣遂絕時年五十七追卹之典無聞焉

聞曰市人驅戰激以義氣出奇制勝強敵爲避封疆之臣

寧可擇地孤軍四應援師無繼大節巍然卹典曷替

潮海扎刺台氏由國子生爲靖安縣達魯花赤至正十二年
黃賊起與縣尹黃紹同集義兵爲守禦計未幾賊兵數萬由武
寧來攻紹赴行省求援道梗不得達潮海獨率衆與賊戰于象
湖大破之乃起進士胡斗元共謀畫而以勇士黃雲爲前鋒拒
守八閱月戰屢勝無何賊鋒益熾雲戰死潮海被圍尋爲賊所
執殺于富州子民安圖襲父職屢帥衆敗賊復縣治踰年賊復
至迎戰力竭賊執而剛之 紹字仲先臨川人至正八年進士
以求援出遇官軍護之入洪都時洪都亦被圍及圍解乃還與
民安圖招諭叛境過建昌之高坪遇賊正衣冠怒罵遂爲所害
斗元字元浩靖安人領鄉薦第一署鰲溪書院山長賊至斗
元以鄉兵擊敗之入縣治與潮海共圖戰守及被執賊脅使降

弗屈乃以土埋其腰不死縛置暗室中斗元什牆以出逃入深山狂病而卒 黃雲撫州人素勇敢每接戰獨以身當敵嘗爲數十人所圍能奮身躍出至是身中數十鎗噴血死

李黼字子威潁州人父工部尙書守中性卞急遇諸子過嚴每一飲酒輒半月醉不解黼百計承順求寧親心不可得嘗跪而自訟無幾微慼怠意初補國學生泰定四年賜進士第一授翰林修撰歷監察御史首言禴祀烝嘗古今大祭今太廟唯二祭而日享佛祀神非禮宜據經行之成均教化之基不當隸集賢宜聽省臣兼領諸侯王歲賜有定額分封易代之際世系戚疏無成書可攷宜倣先代修正玉牒皆不報命巡視河渠上言曰蔡河源出京西宋以轉輸之故平地作堤今河底填淤高出地面秋霖一至橫潰爲災宜按故迹修浚他日東河或有不測之

阻江淮運物當由此分道達京師萬世之利也亦不報至正十
年出爲江州路總管明年紅巾盜起北據徐蔡南陷蘄黃焚掠
數千里九江居下流實江東西襟喉地黼治城濠修器械募丁
壯分守要害且上攻守之策於行省請兵屯江北以扼賊衝不
報黼嘆曰吾不知死所矣十二年春徐壽輝兵渡江陷武昌威
順王及省臣相繼遁賊乘勝破瑞昌左丞孛羅帖木兒方治軍
江上聞之亦遁黼孤立辭氣愈奮厲時黃梅主簿也孫帖木兒
顧山擊賊黼大喜向天灑酒與誓賊遊兵俄至境急檄諸鄉落
聚木石於險塞遏其歸路倉卒無號乃墨士卒面統之出戰黼
身先大呼陷陣也孫帖木兒繼進賊大敗逐北二十里還謂其
下曰賊不利於陸必由水攻苟失備吾屬無噍類矣乃設七星
椿以長木數千冒鐵椎於杪暗植沿岸水中逆刺賊舟會西南

風急賊舟數千果揚帆順流至遇椿不得動為黼火翎箭所射
焚溺無算已而賊勢轉盛西自荆湖東際淮甸諸守臣往往棄
城走黼提屠旅中外援絕賊將薄城黼方引兵登陴布戰具賊
至焚西門乃張弩箭射之賊轉攻東門黼趨東門賊已入與巷
戰知力不敵揮劍叱賊曰殺我母殺百姓賊自項背來刺黼墜
馬與從子秉昭俱死郡民相率具棺葬于東門外兄冕居頰上
亦死于賊秉昭冕季子也事聞封黼隴西郡公謚文忠諡立廟
江州賜額崇烈官其子秉方集賢待制輟耕錄云初武昌陷時
黼謂子秉方曰我國之
守臣當死此土汝可奉母往下江依伯父以存吾後秉方曰父
死國亡若父有何不立黼怒曰汝不遵命是不孝也秉昭亦勸
其死曰若不去則與父無後不孝莫大於是某當與叔
父同死生矣秉方不獲已買舟奉母行去不半月黼死

冊曰瓦解土崩羣然泄泄良策瘋思視為迂計忠雖格天

手難挽運氣作山河奎光長亘

魏中立字伯時濟南人由國子伴讀歷官西臺御史中丞遷守
饒州紅巾賊倪文俊旣陷湖廣分兵攻掠州郡所在無賴子多
乘間竊發不旬日衆輒數萬皆短衣草屨齒木爲杷削竹爲槍
截緋帛爲巾襦彌野皆赤中立聞警卽率丁壯分塞險要以義
兵擊卻之已而賊復合遂爲所執以紅衣披其身中立叱之鬚
髯盡張賊載歸斬水欲屈其從已中立大罵不已遂見殺賊自
饒趨信州總管于大本以土兵禦賊賊破東門入執大本至斬
水獻俘文俊釋其縛畀僞印一紐大本擲印地上亦同遇害
大本字德中密州人由儒學教諭入官

秦不華字兼善伯岳吾氏初名達普化文宗賜以今名世居白
野山

書史會要
云號白野

父塔不台仕白州錄事判官遂居台家貧好讀

書能記問集賢待制周仁榮養而教之年十七舉江浙鄉試第

一明年賜進士及第授修撰轉南臺御史時御史大夫脫歡怙勢貪暴泰不華劾罷之順帝卽位加文宗后爲太皇太后大臣燕鐵木兒伯顏皆胙地分王泰不華率同列上章言嬖母不宜加徽稱相臣不當受王土太后怒欲殺言者泰不華語衆曰此事自我發之甘受誅戮不以累諸公也至正元年除紹興路總管革吏弊除沒官牛租令民自實田以均賦役行鄉飲酒禮教民興讓越俗大化尋召入史館預修宋遼金三史書成遷吏部尙書黃河決奉詔以珪王白馬致祭河神竣事還上言淮安以東河入海處宜倣宋置撩清夫用輓江龍鐵掃撼蕩沙泥隨潮入海朝廷從其言嗣以用夫屯田其事中廢八年台州方國珍依海爲亂劫掠漕運糧執江浙參政朶兒只班迫之上招降狀朝廷授以官不肖赴勢遂積詔泰不華往察實連上剿捕之策

不聽尋除江東廉訪使明年國珍復入海焚掠沿海州郡十一年二月詔李羅帖木兒爲江浙左丞總兵慶元以泰不華稔知賊情狀遷浙東道宣慰使都元帥分兵駐溫州使夾擊未幾國珍寇溫州泰不華縱火筏焚之宵遁旣而李羅密約合兵進討乃先期至大閘洋國珍夜率勁卒鼓譟入官軍不戰皆潰李羅被執反爲國珍飾辭上請朝廷弗知也復遣大司農達識帖睦迺至黃巖招之國珍兄弟皆登岸羅拜退止民舍泰不華欲命壯士乘夜襲殺之達識帖睦迺曰我受詔招降公敢擅命邪事乃止時朝廷方征徐州命江浙省臣募舟師北守大江國珍懷疑復入海泰不華發兵扼黃巖之澄江遣義士王大用往約信仍使來降國珍拘留不遣以小舸二百突入海門州港犯馬鞍諸山泰不華語衆曰吾以書生登顯要誠慮負所學今守海隅

賊甫就招又復爲變君輩助我奮擊其克則汝衆功也不克則
我盡死以報國衆踴躍願行時國珍遣所親陳仲達往復陳其
欲降狀泰不華遽率衆具舟張受降旗乘潮而前船觸沙不得
行垂與國珍遇呼仲達申前約仲達目動氣索泰不華覺其心
異手斬之卽前搏賊船射死五人賊躍入船復斫死二人賊舉
槳來刺輒斫折之俄賊羣至欲抱持過船泰不華瞋目叱之
起奪其刀又殺二人賊攢槳刺之中頸死猶直立不仆投其屍
海中年僅四十九僅名抱琴及臨海尉李輔德千戶赤蓋義士
張君璧從死焉追封魏國公謚忠介立廟台州賜額崇節泰不
華尚氣節不隨俗浮沉太平被劾去相位獨餞送都門外太平
曰公且止勿以我累公答曰士爲知己死寧畏阨邪善篆隸溫
潤道勁嘗重類復古編十卷攷正訛字於經史多有據云

樊執敬字時中濟寧鄆城人性警敏好學由國子生擢授經郎
嘗見帝師不拜曰吾孔氏之徒知尊孔氏而已何拜異教爲歷
官江浙參政至正十二年督海運抵平江十日將發官大宴犒
於海口俄有客船自外至驗其券信令入而不虞其爲寇也旣
入港卽縱火鼓譟時變起倉猝軍民擾亂賊竟入舟劫糧去執
敬自咎失防心抑鬱不解及還省會徐壽輝遣僞將項普畧自
饒信入昱嶺關犯杭州時執敬已被命討賊海上至是事急不
得去掾史蘓友龍進曰城內空虛無備將奈何執敬曰吾淬厲
戈矛當殲賊以報國不濟則以死繼之何畏哉俄報賊奄至遽
上馬率衆出中塗與賊遇射死四人賊逐之又射死三人已而
賊來轉盛且縱火衆皆潰賊知其無援呼執敬降執敬叱曰逆
賊守關吏不謹汝得至此恨不碎汝首何爲降邪乃奮刀斫賊

固中槍而墮從僕田也先馳救亦中槍死追封魯國公

輟耕錄云至正

壬辰秋七月十日紅巾自徽犯杭時執敬守宿衛于省有報已入北關門省吏次第亡去執敬獨披甲上馬率宿衛兵急出救從者止之執敬曰吾封疆之臣不守而去是以私利廢臣道行至清河坊遇他走將又以兵孤且散控其馬首返執敬怒引佩刀斫其人曰城不守何遠遂躍馬逆戰以死死之所則城北水橋也

桂完澤永嘉人

名賢錄及溫州志俱作季姓字坦之幼習蒙古字落魄江湖間

嘗爲平江路管

軍鎮撫爲營家所訴免官會賊攻昱嶺關行省遂假前官令從征完澤勇於討賊凡再戰關下皆大勝尋又與賊鬪轉戰數里深入重圍爲所執其妻弟金德亦被擒皆反縛於樹臨以白刃脅之降德意猶未決完澤呼曰大丈夫死卽死耳不可爲不義德曰此言是也因大罵賊怒剖二人腸而死

王簡

史稱王伯顏今從志

字伯敬濱州霑化人以材薦由烏程縣尹遷知

福寧州至正十二年轉福建鹽運同知紅巾賊起江淮由撫肝

入閩憲府以時方倣擾仍留領州事未幾賊自邵武間道偪福寧乃與監州阿撒都刺募丁壯五萬分扼吟要賊至楊梅嶺立柵簡與仲子相馳破之賊帥王善擁衆直壓州西門胥隸皆解散麾下唯白挺市兒數百人簡射賊不反顧俄馬中流矢馬蹶遂見執善曰聞公有惠政欲屈再尹此州簡訶之曰我天子命官不幸失守義當死肯從汝反乎善怒叱左右撻以跪弗屈羣毆之簡嚼舌以血嚙善曰反賊殺卽殺何以毆爲吾民天民也不可害官軍旦暮且至百萬之師雷擊電掃汝輩小醜將無遺種顧敢爾邪有頃賊執阿撒都刺至善厲聲責其拒關噤不能對簡復唾善曰我殺賊何言拒邪我死當爲神以殺汝言訖挺頸受刃頸斷無血惟涌白沫如乳暴屍數日色不變

輟耕錄云時年已七

十賊并殺阿撒都刺欲釋相官之相詈曰吾與汝不共戴天恨

不寸斬汝肯受汝官邪賊殺之妻潘氏挈二女逃民間聞變恐
被辱母子同縊死簡既歿賊時覩其引兵出入有州僧林德誠
者奮義討賊望空嘆曰王州尹宜率陰兵助我賊遙見四面皆
紅衣軍大懼走福寧遂平事聞追封太原郡侯名賢錄云長子
屍棄葬烏程胡命以積壤父爵除給與總管張士誠陷城積亦
不屈死閩志云陳陽益字子謙為泉州府稅課使賊攻福寧
州知州王簡檄陽益率民兵拒賊賊
執之脅使降陽益抗義書賊同見殺

冊曰命官跪賊紛紛而是何獨斯人死不屈志一腔熱血
已竭生前惟餘白沫為虹貫天

陳君用字子材延平人少負氣勇猛過人紅巾賊入閩閩閩授
君用南平縣尹給錢五萬緡俾募兵君用散家財繼之導官軍
復建陽浦城授同知建寧路事亡何賊圍福州君用率兵往援
大敗賊衆遂引兵踰北嶺至連江阻水而陣君用曰今日不盡

殺賊吾不復生還乃率壯士徒涉斬殺賊稍潰旣而復合君川大呼陷陣中槍死追封潁川郡侯諡忠毅

彭庭堅字允誠溫州瑞安人至正四年進士授同知沂州事毀牛皇神祠驅鄰境上馬賊免民橫急徵歛州人甚德之俄以平反獄囚忤上官意遂解歸十年詔選守令起崇安縣尹屢平閩境賊遷同知建寧路事江西寇熾庭堅率民兵克復建陽又進兵浦城設雲梯火礮晝夜急攻賊遁去尋拜福建道宣慰司副都元帥鎮邵武十四年盜侵政和松溪南臺中丞吳鐸督軍建寧檄庭堅至時鎮撫萬戶岳煥隸麾下煥素悍縱卒爲暴庭堅欲繩以法煥懼使部卒乘其不備詐爲賊兵突入鋒旣交衆皆散走庭堅獨留不去遂遇害崇安民立祠像歲時祭禱數降靈響旁邑立祠亦如之南臺御史余觀行部至獲賊斬之上聞追

封忠愍侯仍表其墓廟

劉濬字濟川其先興州人曾祖海金進士第一仕至河南府尹死國難子孫遂家河南濬由廉訪司書吏授連江縣寧善鄉巡檢至正十三年蘄州賊帥王善寇閩官軍守羅源拒之羅源與連江接壤勢將迫濬妻真定史氏故相家女也有才識謂濬曰事急矣盡出奩中物募壯士百餘人命仲子健將之浹旬間衆至盈萬賊尋破羅源分道攻福州濬拒之辰山三戰三捷俄聞福州陷衆驚潰濬獨率健兵進遇賊于中麻突其陣斬前鋒五人賊大至濬中箭墮馬健下馬掖父俱被獲濬忿戟手大罵賊縛之階下先斫一指罵益厲再斫一指亦如之指且盡斫兩腕次及兩足濬色不少變遂割其喉舌死健亦以死拒賊善義之使斂父屍瘞焉健歸請兵帥府以復讐弗聽乃散家貲結死士

百人詐爲工商流丐入賊中夜半發火大譟賊驚擾自相屠戮
健手刃其殺父者并擒善獻帥府磔之事聞授健古田縣尹爲
濟立祠福州北門外有司歲時致祭

汪澤民字叔志婺源州人宋端明殿學士藻七世孫也家貧力
學通諸經成延祐五年進士歷南安信州平江三路推官僧淨
廣與他僧有憾久絕往來一日邀廣飲廣弟子急欲得師財潛
往殺之訴於官他僧不勝考掠遂誣服澤民視其刀上有鐵工
姓名名工問之乃其弟子刀也一訊吐實人驚以爲神至正三
年除國子司業預修三史書成遷集賢直學士未兩月移書告
老大學士曰集賢翰林實養老尊賢之地願少留以副上意澤
民曰以布衣叨榮三品志願足矣遂以禮部尚書致仕既歸與
門生故人相往返超然若忘世者

環谷集云時與汪克寬輩游
翠微祥符諸寺賦詩爲樂

十五年斬黃賊犯宣州廉訪使道童雅重澤民日就之詢守禦計城得無虞明年長鎗軍瑣南班等叛來寇城或勸之去澤民慨然曰我雖無官守領受國厚恩臨危愛死非臣子節留宣州籌畫戰守累敗賊兵旣而寇益衆城陷爲所執遂遇害時年七十追封譙郡公諡文節

劉畊孫字存吾茶陵州人文宗至順元年進士授臨武縣尹縣近蠻獠畊孫至召父老告之曰吾儒士也今爲汝邑尹爾父老當體吾意訓子弟以孝弟力田暇則事詩書勿自棄以干吾政乃爲建學校求民間俊秀教之設俎豆習禮讓朞年文化大興歷建德徽州瑞州三路推官所至詳讞疑獄清政卓然可紀至正十二年斬黃賊破湖南畊孫傾家貲募義丁以援鄉里賊至輒却故茶陵久不失守十五年轉寧國路推官歲饑勸富民出

粟賑之活人以萬計長鎗軍瑣南班等攻寧國畊孫分守城西
南日署府事夜率兵乘城固守賊引衆緣堞而上城陷力戰遇
害弟燾孫字養吾以國學生下第授常寧州學正湖南陷長吏
棄城走民奉州印請燾孫爲主城賴以完者一年外援既絕死
之長子碩爲江夏縣魯湖大使起義兵援茶陵亦死 劉與孫

紀見楚

者燾孫弟也官南豐州同知值寇亂仗節死于臺城
褚不華字君實隰州石樓人泰定初補中瑞司譯史歷僉河西
廉訪司事未幾移淮東紅巾賊蔓延兩淮勢張甚褚不華行郡
至淮安極力爲守禦計賊至多所斬獲且請知樞密院老章以
判官劉甲守韓信城相犄角復上章劾總帥逗撓狀朝廷錄其
功擢廉訪使甲有智勇與賊戰輒勝賊憚之不華頗賴焉總兵
者聞其効已益恚嫉乃檄甲別將兵擊賊與以困不華甲甫去

韓信城陷賊乃掘塹相銜捷水寨以圍淮安不華知事危退入
城時城三面皆賊惟北門通沔陽倚其芻餉而赤鯉湖被賊據
沔陽大路又絕食且盡攻圍日益急總兵者屯下邳按兵不出
遣使十輩告急皆不應城中餓者什道上卽爭取啖凡草木螺
蛤魚蛙燕鳥及靴皮鞍轡革箱敗弓之筋皆食盡父子夫婦老
稚更相食撤屋爲薪人多露處坊陌生荆棘力窮城陷不華猶
據西門力鬪中傷見執爲賊所轡次子伴哥冒刃抱父屍亦見
殺時至正十六年十月乙丑也不華守淮安五年身經數百戰
精忠大節人比之張巡云追封衛國公諡忠肅

田曰將不能戰惟逞私怨存亡之秋睢盱以困髓竭膏枯
捍禦無倦苟非精忠人何以勸

王士元字堯佐恩州人泰定四年進士由棣州判官遷知棣州

將軍與日繁士元惟惜民力雖被將士訶責弗顧也尋調知
州州濱黃河雉堞不完至正十七年賊迫城守兵悉潰散士元
坐堂上顧其子致微使避曰吾守臣居此職也若可逃生子侍
立不忍去賊前問曰爾爲誰叱曰我王知州也強賊識我否賊
欲縛之士元奮拳毆賊賊怒并其子見殺

卞琛大名人家世力農早游學京師補國子生旣而丁母憂仍
服農於家至正中鄰郡盜起剽掠至其境琛與從子小十府史
李仲亨等協謀統丁壯數百人出擊民兵無弓矢直以鉤鉏白
梃當賊賊矢雨集琛衆潰散被擒小十仲亨皆死賊素知琛名
謂曰從我解汝縛不從殺汝琛唾曰我國子生也視汝輩真狗
彘耳吾寧義死不從逆生遂見殺

續弘簡錄卷三十七終

續弘簡錄元史類編卷三十八

皇清詹事府少詹事

旌德二 忠節

余闕 道童 伯顏不花的斤 附海魯丁 蔡誠 蔣廣 全普庵撒里

附哈朵里不花 李齊 趙璉 弟琬 納速刺丁 石普

盛昭 楊乘 孫撟 月魯不花 達識帖睦邇 附普化 帖木兒

韓因 張桓 喜同 附塔 郭嘉 趙洙 伯顏師聖

董搏霄 弟昂 王英 顏瑜 附曹 鄭玉 福壽 附達尼達思

石抹宜孫 附邁里古 普顏不花 附申 喬彛 附張崑起

楊樸 栢帖穆爾 迭里彌實 附獲獨步 呂復 閔本 拜住

趙弘毅 子恭 黃暉 附張庸 王遜志 張正蒙 徐獮頭

余闕字天心唐兀氏世居河西武威郡父沙刺臧卜官廬州遂

爲合肥人少孤授徒養母元統元年賜進士及第授同知泗州
事爲政嚴明宿吏皆憚之入爲應奉翰林文字轉刑部主事以
不阿權貴棄官歸名修宋遼金三史復入翰林爲修撰改監察
御史出爲湖廣行省郎中當莫徯變反右丞沙班堅不出師闕
曰公受天子命爲方嶽重臣不思執弓矢討賊乃欲自逸邪沙
班曰郎中語固是如芻餉不足何闕曰公第往此不難致闕下
令趣之三日皆集沙班遂行嗣丁母憂歸廬州沔陽陳友諒盜
起據有荆楚起闕爲淮西宣慰副使僉都元帥府事分守安慶
時南北音問隔絕兵食俱乏抵官十日寇至拒却之乃集將吏
議屯田戰守計環境築堡砦選精甲外扞而耕墾其中屬縣潯
山八社土饒沃悉闢爲屯田夏大雨江漲田禾半沒城下水湧
有物吼聲如雷闕祀以少牢水輒縮秋稼登得糧三萬斛度軍

有餘力乃浚隍增卑隍外環以大防深塹三重南引江水注之
植木爲欄城上起飛樓表裏完固盜方環布四外闕提勁卒數
千屹然爲江淮保障且通道江右俾商旅四集友諒遣將趙普
勝山池州攻城經旬竟敗去尋拜淮南右丞安慶倚小孤山爲
藩蔽命義兵元帥胡伯顏統水軍戍之友諒自上游直擣小孤
山伯顏與戰四日夜不勝奔還安慶賊追至山口鎮遂薄城闕
遣兵扼之觀音橋賊乘東門張紅旗登城闕簡死士力擊賊復
敗去旣而并軍攻東西二門又却之賊患甚乃剗欄環城疾攻
金鼓聲震地闕部分諸將各以兵杆賊晝夜不得息友諒軍西
門四面蟻集外無一甲之援西門勢尤急闕身當之徒步提戈
爲士卒先仍分麾下將督三門之兵自以孤軍血戰身被十餘
創日中城陷城中火起闕知不可爲引刀自剄墮清水塘中妻

耶士氏子德生女福童皆赴井死

按關妻史稱耶士氏元史節要作耶律氏惟賈良伯死節

記作夫人蔣氏後關姪孫宗烈云當時有妾耶律耶士氏而夫人實蔣氏子德臣女安安皆其所生也維揚張毅所記如此

同時死者守臣韓建全家被害建方臥疾賊執之以去不知所

終城中官民相率登城樓自捐其梯曰寧死此誓不從賊焚死

者以千計其知名者萬戶李宗可紀守仁陳彬金承宗元帥府

都事帖木補化萬戶府經歷段桂芳千戶火失不花新李盧廷

玉葛延齡丘沆許元琰奏差兀都蠻百戶黃寅孫安慶推官黃

禿倫歹經歷楊恒知事余中懷寧尹陳巨濟凡十八人時至正

十八年正月丙午也闕號令嚴信與下同甘苦嘗病不視事將

士皆額天求以身代闕聞之強衣冠起當出戰矢石交下如雨

士以盾蔽之闕必却之曰汝輩亦有命何蔽我爲故人爭用命

稍暇卽注周易率諸生詣郡學會講立軍士門外以聽使知尊

君親上之義留意經術五經皆有傳注詩體尙江左篆隸亦古

雅可傳

元詩選云嘗讀書青陽山學者稱青陽先生其遺文有青陽集大卷

闕旣死賊義之求屍

塘中具衣冠瘞之西門外詔封剛國公諡忠宣

志云李宗可斬州人有勇略余

關以兄女妻之闕死乃驅其家屬盡殺之縱飲至醉自刎陳巨濟桐城人素以忠義自許闕聞其名辟爲懷寧尹城陷不屈死

冊曰節堪守正義激千秋矧伊一郡慷慨同仇霽雲萬春從之如鶩講學非迂忠肝剖露

道童號石巖高昌人以世胄入官性沉毅寡言由江浙叅政歷

右丞轉本省平章素負清望至正十一年調行省江西徐壽輝

陷斬黃土寇蠡起道童深憂之郎中普顏不花曰有章伯顏左

丞者致仕居撫州熟知軍務宜以禮請之使專任軍旅庶事有

可濟道童從其言伯顏亦欣然起曰此報國之秋也至則與普

顏不花設禦敵計甚悉明年正月湖廣陷普顏不花將兵往江

州至石頭渡遇賊戰敗道童聞之恐卽懷印走及普顏不花還
與伯顏定城守計後數日始自民家還省治議分門各守以備
敵三月賊衆來圍城城中置各廂官及各巷長晝夕堅守衆心
翕然道童素卹民能任人故士卒樂爲之用城被圍兩月道童
密召死士數千人面塗以青額抹黃布衣黃衣爲前鋒又別選
精銳數千爲中軍而募助陣者殿後夜半開門伏柵下黎明鉦
鼓大震因奮擊賊賊驚以爲神敗走遂乘勝擣其營復分兵掃
其餘黨伯顏以疾卒于軍是秋朝廷命火尼赤爲左丞將兵來
助與道童平富瑞二州分鎮其地適歲旱公私匱乏道童移咨
江浙借米數十萬石鹽數十萬引凡軍民約三日人糴官米一
斗又三日買官鹽十斤各入昏鈔二貫民皆安之賊亦不敢犯
其境十八年夏四月陳友諒復攻江西時火尼赤已由左丞遷

平章加營國公得專制素與道童不相能見城將陷且夜遁道童亦棄城退保撫州欲集諸義兵圖恢復勢已不可爲因嘆曰我爲元朝大臣官至極品今城陷不守尚何面目見人乎適賊追者至道童歡迎敵渡水未登岸衆乘之遂爲所害賜諡忠烈

志云有黃冲者字季中南昌人授義兵千戶僞漢陷城火尼赤通冲悉帥健勇來援爲叛將所殺閏六月父得其元塋焉

伯顏不花的斤字蒼巖畏吾兒氏駙馬都尉雪雪的斤之孫朶

爾的斤子也

高昌王世勳碑作帖木兒補化子

調儻好學曉音律初用父廕同

知信州路事累平賊有功歷遷浙東道廉訪副使守衢州至正十八年陳友諒遣賊王奉國寇信州路明年正月伯顏不花自衛引兵援信被走之時鎮南王子大聖奴屯兵城中聞援師至開門出迎拜馬首伯顏不花登城四顧誓以破賊自許乃大饗士卒分命大都閫高義爲左右翼奮擊入賊營斬首數千級後

歎曰友諒弟友德列營東城攻益急遣使來說降高義潛與賊
通往見奉國明日奉國令義以計來誘伯顏不花坐城上見義
單騎至謂曰汝欲作說客邪我頭可斷足不可移乃數其罪斬
之由是日夜鏖戰糧竭矢盡而氣不少衰有大呼城下者曰有
詔參謀海魯丁臨城問之曰何來曰江西來海魯丁曰如此則
賊耳吾元朝臣子可受爾僞詔乎呼者曰我主聞信州久不下
知爾忠義故來詔爾徒守空城何爲海魯丁曰汝不聞張睢陽
事乎僞使者不答而去伯顏不花笑曰賊欲我降邪城存與存
城亡與亡吾計之熟矣時軍民唯食草苗茶紙旣盡括靴底煮
食之又盡掘鼠羅雀及殺老弱以食六月奉國親來攻城晝夜
不息者餘旬賊穴地百餘所魚貫梯城上士卒力疲不能戰城
遂陷大聖奴海魯丁皆死之伯顏不花力戰不勝遂自刎其部

將蔡誠盡殺妻子與蔣廣奮力巷戰誠遇害廣被執奉國愛其
勇使之降廣曰我寧爲忠死不爲降生賊怒磔廣于竿大罵而
絕先是伯顏不花之援信州也嘗南望泣曰我爲天子司憲視
彼城之危急忍坐視乎吾知上報天子下拯生民餘皆無可恤
所念者太夫人耳卽入拜其母鮮于氏曰兒今不得事母矣母
曰爾爲忠臣吾卽死復何憾鮮于氏太常典簿樞女也伯顏不
花因命子也先不花奉其母間道入閩中及死朝廷賜諡桓敏

書史會要云鮮于太常甥草書逼
真舅氏詞繪寶鑑云亦工畫龍

有陳受者信州小民也伯顏

不花知其有膂力募爲兵戰敗被獲痛罵不屈賊焚殺之

全普庵撒里字子仁高昌人初爲中書省檢校時太師汪家奴
擅權臺諫無敢言者普庵撒里獨於衆中歷數其過諤諤無懼
色及拜監察御史卽首劾汪家奴十罪坐是見黜然氣節不以

摧折稍沮歷授贛州路達魯花赤潁州盜起卽修築城壘發公帑募勇士得三千人練習皆可用屬邑有被陷者遣兵克復之境內悉安至正十八年拜江西參政仍分省贛州時江西下流諸郡皆爲陳友諒所據乃與總管哈海赤戮力同守賊將幸文才率兵圍贛使人誘降普庵撒里斬其使日擐甲登城拒戰凡四閱月兵少食盡義兵萬戶馬合沙欲舉城降普庵撒里不從遂自刎事聞贈諡愍哀哈海赤守贛尤久城陷賊將脇之降哈海赤曰與汝戰者我也爾賊母殺贛民當速殺我遂見殺

朵里不花字端甫蒙古人由宿衛累官遼陽平章陳友諒陷江西詔移江西行省遂泛海南下趨廣東駐師揭陽招降土寇金元祐克復循梅惠三州自是英肇欽連諸郡皆附且治兵由梅嶺將赴江西而元祐有異志遮道固留陰令其子率外賊突入

奪符信殺官吏變起倉猝衆莫能支朶里不花爲鎗所中子達
蘭不花率麾下力與抗死之朶里不花被執擁至太平橋罵不
絕口遂爲賊所醢其妻卜顏氏妾高麗氏在側不去皆大罵曰
我平章遇爾父子厚爾何暴逆至此亦皆遇害其部將哈乞吳
普顏阿刺不花歹不花等俱戰死

李齊字公平廣平人家貧嘗作客江南工辭章元統元年賜進
士第一歷僉河南淮西廉訪司事移知高郵府至正十三年秦
州白駒場亭民張士誠爲亂破本州淮南行省舉兵討之不克
乃遣齊往招降被拘久之亡何其黨自相攻殺始縱齊歸士誠
佯請降行省授以民官未幾復鼓變殺叅政趙璉掠官庫走入
得勝湖陷興化時左丞僕哲篤方鎮高郵使齊守甓社湖齊旣
出高郵遂陷賊蔓延入寶應會有詔赦叛者使至高郵不得入

賊給曰必李知府來乃受詔再遣齊往至則囚之齊益聲言士
本無降意特遷延爲繕飭計耳官軍諜知之進攻城士誠呼
齊出叱使跪齊反叱曰吾膝如鐵豈爲賊屈賊怒扼之跪齊立
前詎乃倒曳槌碎其膝剛之論者謂大科三魁若泰不華沒海
上李黼隕九江洎齊之死皆不負所學云

冊曰聖賢立教首重忠孝自竊虛聲遂至貽誚所學何事
乃失其操二李及泰節烈相肖巍巍大科三辰並耀

趙璉字伯器潁川人祖宏偉起家泰和尹著循聲仁宗朝官浙
東廉訪副使聞郡人許謙得宋儒道學之傳延致爲師於是浙
東人知向學卒諡貞憲璉登至治元年進士第歷官杭州路總
管浙右病徭役民充坊里正者皆破家璉議以屬縣坊正爲雇
役里正用田賦以均之民至今稱便至正中河南盜起湖廣荆

襄皆降兩淮騷動朝廷析河南地立淮南江北行省于揚州以
璉參知政事分鎮真州璉方病卽輿疾行會張士誠起海濱陷
泰州興化高郵知府李齊往招之士誠僞請降且乞從征自効
乃移璉鎮泰州璉趣士誠治戈船趨濠泗士誠疑憚不肯發又
覘知璉無備遂復反夜四鼓縱火登城璉力疾捫佩刃上馬與
賊鬪市衢詰之曰汝輩罪在不赦今旣宥爾誅戮且錫以名爵
朝廷何負汝乃復反邪賊以槊撞璉墜地璉瞋目大罵死之其
僕楊兒以身蔽主亦見殺弟琬字仲德仕爲台州路總管至正
二十七年方國瑛以舟挾琬至黃巖琬潛登白龍舉止民舍絕
粒七日或勸之食輒瞑目卻之而死

綰速刺丁字士瞻其父馬合木從征襄陽以勞擢濟州達魯花
赤國家大名納速刺丁起身鄉進士淮東宣慰司辟爲掾泰州

賊起納速刺丁建議築四城立外寨捷堤穿河募兵與賊抗行省檄其提賊艦巡江駐師龍潭口賊不得渡屢有戰功留守蕪湖江口泰州李二作亂移捍高郵得勝湖賊船乘風來攻擊敗之李二失援遂降其黨張士誠復殺二爲亂襲據高郵屯兵東門納速刺丁以舟師會真滁諸軍討之距三朶鎮賊衆猝至麾兵挫其鋒後賊鼓譟進更發火鏃射之死者蔽流而下賊繚船於背盡銳來攻諸官軍皆遁納速刺丁以死自誓顧謂其三子寶童海魯丁西山驢曰汝輩可脫走三子不肯去同死之追贈元帥府經歷

石普字元周徐州人至正五年進士授國史院編修官改經正監經歷淮東西盜起樞密院董鑰薦普材于朝會丞相脫脫討徐州命從行徐平歷升樞密院都事從守淮安時張士誠據高

郵普詣丞相而陳破賊之策曰高郵負重湖之險地皆沮洳騎兵猝莫能前願假步兵三萬保取之高郵既平則濠泗易破普請先驅爲天下忠義倡脫脫壯之命權山東義兵萬戶府事招民義萬人以行次范水砦日未夕普令軍中具食夜漏三刻下銜枚趨寶應卽登城樹幟城上賊大驚潰乃水陸進兵乘勝拔十餘砦直抵高郵縱火燒開門賊懼將棄城走總兵者遣蒙古軍千騎突出普軍前欲收先入功賊以死扞城蒙古軍恇怯卽馳回普止之不可遂爲賊所蹂踐率墮水中普軍亂賊乘之普勒餘兵血戰良久直入賊陣中援兵忌普成功按不進從者僅三十人搏戰至日西被創墮馬復步戰數合賊益至指曰此必頭目可生致之普叱曰我卽石都事也何云頭目左脇爲賊槍所中猶手握其槍斫賊賊衆攢槍來刺普與從者力盡俱死

盛昭字克明歸德人由儒學官累遷淮南行省照磨會詔使往高郵諭張士誠不得達還詭稱賊已迎拜但乞名爵行省不虞其欺再遣昭入高郵授以萬戶告身士誠拒不納拘諸舟中昭語所從吏曰吾之止此有死而已既而官軍逼高郵士誠授刃以兵使出拒昭叱曰吾奉命招撫汝汝拘留詔使罪不容誅反欲吾從汝爲賊邪賊怒先剗其臂肉而後磔之

楊乘字文載濱州渤海人至正初爲介休縣尹民饑散爲盜乘立法招之俾自新盜由是息後累官江浙行省員外郎坐海寇掠漕舟免官寓松江張士誠入平江其徒郭良弼董綬極稱乘才士誠遣張經招之乘曰良弼等皆名臣今已失節傾欲引我濟惡邪且議經平日讀書所學何事經俛首不能對乘且與客痛飲竟日不言客問盜行乎曰乘以一小吏致身顯官有死無

貳何行之有經促其行愈急乘乃整衣寢自經死轍耕錄云乘

史辟中書參議掾歷官殺賊介休二縣尹拜監察御史擢江浙

行省員外郎是年杭州陷乘坐黜退居松江青龍鎮後御史言

乘職在贊理不當罪宜復其官事遂自十六年張士誠陷平江

遣所署官吳縣丞張經資禮幣造請乘遣人告曰吾廢處田里

久不足以辱使者吾當擇日受命請以幣置門外經如其言乘

命子適卓其性體告祖彌既竣事復命酒飲坐至夜分二子尚

立侍命曰若且休吾將就寢詰旦適等怪寢門未啓發視之則

已自經得手書大約言死生晝夜之理且以得全晚節為快

孫搗字自謙曹州人至正二年進士原官濟寧路錄事張士誠

據高郵或謂其有降意朝廷遣翰林待制烏馬兒為使前往招

之而用搗輔行搗家居不知也中書加搗集賢待制給驛就其

家強起抵高郵士誠不廷詔搗等既入城反覆開諭士誠作竦

聽已而拘之他室或日一饋食欲腸之降搗惟事詬斥乃令其

黨捶搗肆其凌虐搗不為動及士誠據平江轉掠湖松諸州搗

與其部將張茂先謀持搗所授站馬劄子遣壯士赴鎮南王府

約日進兵謀泄竟爲所害後賊中見失節者輒自相嗤曰此豈
孫待制邪追贈曹南郡公諡忠烈

月魯不花字彥明蒙古遜都思氏父脫帖穆耳泰定三年以千

戶分鎮于越

志云性廉直尚節義遊兵掠天台烈婦王氏死于清風嶺慨然爲之立廟

月魯不花從

父任就試江浙鄉闈中右榜第一榜未發試官夢月中有花象

已而果符其名登元統元年進士第授台州路錄事司達魯花

赤縣未有學乃首建孔子廟延儒士爲之師以教後進歷官吏

部員外郎奉命至江浙糴粟二十四萬石餉軍至則第戶產之

高下爲羅之多寡民不擾而事集尋拜監察御史首言天子宜

躬祀南郊嚴祭太室皇太子當簡老成輔導以成其德帝嘉納

之升吏部侍郎時方重選守令以保定密邇京畿授本路達魯

花赤俄除吏部尚書保定民詣闕乞留乃以尚書知郡事會賊

北渡河月魯不花日修城濠爲戰守具奏留五省八衛兵護本
郡兼統黑軍數千人及團結西山八十二寨民義軍勢大張賊
再侵境皆不利去旣召還爲詳定使去保定一月而城陷至正
十九年拜南臺御史中丞由海道趨紹興旣而除浙西廉訪使
時張士誠據浙西僭王號度弗可與其乃謂從子同壽曰吾家
世受國恩恨不能刺賊以報國矧與之同處乎卽具舟載妻子
而自匿木櫃中蔽以藁秸脫走至慶元改山南道廉訪使浮海
北往道阻還抵鐵山遇倭寇登舟攫之令拜伏月魯不花曰吾
朝廷重臣寧爲賊拜邪遂遇害次子樞密院判老安姪百家奴
扞敵亦死之家奴那海刺殺賊首同舟死事者八十餘人追贈
遼陽行省平章諡忠肅

達識帖睦爾字九成康里脫脫子也幼入國學爲諸生讀經史

悉通大義尤好學書

書史會要云大字學釋
博光小字亦有骨力

初以世胄補官至

正九年遷湖廣平章時沅靖郴桂等路徭獠竊發達識請置三

分省一治靜江一治沅靖一治郴桂以左右丞參政分兵鎮其

地已而諸徭獠悉降詔還拜大司農台湘方國珍起海上奉詔

與浙東宣慰使秦不華同往招諭

史作秦政樊
執敬者誤

累遷江浙行省

左丞相許便宜行事江淮盜勢日盛南北道梗所部郡縣多淪

沒十六年二月張士誠陷平江七月逼杭州達識棄城走富陽

會苗軍帥楊完者為江浙參政駐嘉興引兵擊走士誠達識乃

還鎮明年士誠詐請降願輸漕粟達識欲不許完者固勸乃許

之承制拜士誠太尉其黨皆授官有差士誠素欲圖完者而完

者時又強娶平章慶童女達識雖主其婚然心實且憎乃陰與

士誠合謀令以兵除之士誠出兵復建德完者營於杭州北不

爲備遂被圍苗軍潰完者自殺士誠遂據杭州旣而自立爲吳
王乃逼徙達識于嘉興峻垣墻銅門閤守之使人至紹興索行
臺印御史大夫普化帖木兒封印置庫中曰頭可斷印不可
與又迫之登舟曰身可死義不可辱也從容沐浴更衣與妻子
訣賦詩二章仰藥死臨死擲杯地上曰我死矣逆賊當踵我亡
也達識聞之嘆曰大夫且死吾不死何待命左右以藥酒進飲
之而逝普化帖木兒字兼善答魯乃蠻氏行臺御史大夫帖不
哥子也志稱答魯兼善者卽是

韓因字可宗汴梁人少習舉子業負氣不羣潁州妖人劉福通
兵起亦以紅巾爲號據汝寧官軍討之久不克會朝廷詔赦叛
逆募可持詔入賊者因應命假以唐州判官使焉賊渠悉其黨
搖動止因於外納詔不讀旋縱因歸報因出乘馬周賊屯大呼

曰汝輩好百姓何不早降歸田里而甘從賊驅使邪衆愕眙相顧賊渠追因責其所言因極口肆詈賊怒寸割之

張桓字彥威真定藁城人父木知汝寧府因家焉桓以國子生釋褐累官西臺御史以言事不合去劉福通陷汝寧桓避居確山賊久知桓名襲獲之羅拜請爲帥弗聽囚六日擁至渠魁前桓據榻坐與之抗論順逆其徒梓桓起跪桓仰天大呼叱益厲且屢唾賊面賊猶不忍殺謂曰汝但一揖亦恕汝死桓瞋目曰吾恨不能斬汝首官聽汝誘脇而折腰哉賊知終不可屈遂刺之後語人曰張御史真鐵漢害之可惜追贈禮部尚書諡忠潔

懷錄云桓謝職居確山縣而陷賊魁素聞桓有治績置上

等之受僞官桓唾之遂縛桓妻孥九人至先殺妾次殺子女

以及妻每殺一人則詬桓曰御史若降

餘可免桓弗爲動此至正辛卯八月事

喜同河間人本姓周由後宮衛士任南陽縣達魯花赤居二歲

劉福通兵抵南陽境縣素無城且無守卒喜同卽以死自許與家人訣曰吾與汝等不能相顧矣乃策厲義兵奮力與賊搏賊知無後援戰愈力城陷喜同突圍將自拔賊橫刺其馬馬蹶喜同鞭馬躍而起手斬刺馬者俄爲他賊所追身被數創不能鬪遂見執爲所殺妻邢氏帥家僮數人出走遇賊奪其刀斫之且罵且前亦見殺一家死者二十餘人時襄陽錄事司達魯花赤塔不台字彥暉元統元年進士魏王軍汝亳塔不台來供餉王嗜酒輕戰備一夕賊劫王王臥未能起爲所執塔不台馳騎奪王亦爲賊獲比曉見賊渠王拜乞活塔不台以足蹴之曰王猶欲生乎賊復屈其拜塔不台拒而諾之且與縛者角遂被支解

志云明兵攻南陽喜同一家皆死節聞郡哀之未知孰是

郭嘉字元禮濮陽人祖昂父惠俱以戰功顯嘉慷慨有大志登

泰定三年進士第累官廣寧路總管屬盜起詔團結義兵嘉招
集民數千教以坐作進退號令齊一賞罰明信故東方甲兵之
精稱嘉爲最至正十八年劉福通黨由大同焚掠上京嘉躬率
義旅出禦且竭家貲倡勇敢旣而遼陽陷孤城無援嘉歎曰自
我祖父有勲王室今日盡忠吾分內事況身守此土當生死以
之餘不足惜頃之賊至圍城亘數十里有大呼者曰遼陽我得
矣何不出降嘉挽弓射呼者中其左頰墮馬死賊稍引退嘉開
西門逐之賊大至力戰以死追封太原郡公諡忠烈

趙沐河南湯陰人官遼陽路儒學提舉至正十八年劉福通黨
略遼陽沐被執欲使降沐叱曰我爲儒官職司名教豈肯從汝
爲逆者賊怒殺之繼執其妻許氏嚇之以刃氏罵曰吾母與兄
弟居武昌者皆死於賊今吾夫又死焉使我得報汝當醢汝矣

何曜爲賊并殺之

列女傳云許氏集賢大學士有王之姪女

伯顏師聖字宗道哈刺魯氏世居開州漢陽縣生三歲嘗以指

畫地或三或六若爲卦者六歲從里師授孝經論語卽成誦蚤

喪父其兄曲出購經傳諸書資之日夜誦不輟稍長受業宋進

士建安黃坦坦曰此子敏悟過人非諸生可比因命以顏爲氏

且名而字之久之坦辭曰余不能爲爾師羣經有朱子說具在

歸而求之可也弱冠卽以斯文爲已任學者來相質難隨問辨

咸解其惑而去自是從游日衆至正四年以隱士徵至京授翰

林待制預修金史旣畢辭歸已復起爲江西廉訪僉事數月以

病免及還益修輯六經多著述其爲學務真知力踐不屑事舉

子詞章士出其門不問而知爲伯顏氏學者十八年紅巾賊蔓

延河北師聖言於省臣將結鄉民爲什伍以自保而賊兵大至

師聖渡漳北行邦人從之者數十萬家至磁州與賊遇賊知其
名生刼之不屈引頸受刃與妻子俱遇害年六十有四旣死賊
羣剖其腹見心有數孔相顧曰古稱聖人心有七竅此非賢士
乎乃納心于腹中覆塙拵之詔諡文節太常諡議曰以生平有
用之學成臨義不奪之
節乃古之君子人者生平語錄甚富惜皆燬于兵

聞曰讀書明理踐履篤確月露風雲鳥足相較顛沛不離
乃真道學

董搏霄字孟起磁州人由國子生辟西臺掾歷遷浙東宣慰副
使所至皆有聲至正十一年除濟寧路總管從江浙平章教化
討徐壽輝進兵安豐屢敗賊衆復其城十三年命移軍援江南
至湖州時賊將項普略引兵自徽饒陷杭州教化從間計對曰
賊見杭城子女玉帛必縱慾不暇爲備宜急攻之若退保湖州

倘賊乘銳趨京口則江南不可爲矣諸將難其行搏霄拔劍正色曰諸君荷國厚恩而臨難苟免今相君在是敢有慢令者斯卽進兵薄杭城賊迎敵至鹽橋凡七戰追殺至清河坊賊奔接待寺塞其門焚之皆死遂復杭州賊復自昱嶺關寇於潛行省復令討之卽日赴臨安扼新溪分兵守入杭要路後進兵至呌口及虎檻遇賊屢敗之追殺至於潛遂復縣治由昌化進克昱嶺關賊有犯千秋關者搏霄還軍守於潛賊大至焚倚郭廬舍搏霄按軍不動左右請出兵曰未也遣人執白旗登山望賊約曰賊謂我怯必少懈伺其間則麾旗且伏兵城外皆授以礮復約曰見旗動礮卽發已而旗動礮發城中兵盡出遂復千秋關賊復攻獨松百丈幽嶺三關搏霄先以兵守多溪多溪者三關要衝也旣分軍爲三各出一關會擣賊巢遂乘勝復安吉賊復

來窺獨松搏霄更以兵守苦嶺及黃沙嶺賊帥多來降復進兵
克廣德俄斬饒諸賊犯徽州有道士能作十二里霧搏霄以計
破之妖霧頓開諸伏兵皆起襲賊營後賊大潰獲道士焚其妖
書斬之遂平徽州輟耕錄云搏霄號令嚴肅凡尅復諸郡不殺
傷不抄掠四方之士歸之者禮遇勤至尊酒
相薦起立捧觴取其所
長而任之得待士之體十四年遷樞密院判官從丞相脫脫征
高郵分戍鹽城興化賊巢踞大縱得勝兩湖間凡十有二悉勦
平之卽其地築芙蓉砦賊入輒迷故道自是不敢復犯賊恃習
水渡淮北入安東州搏霄招善水者五百人與戰于大湖破之
遂復安東連克北沙廟灣沙浦等砦尋進兵泗州不利賊乘勝
東下門徑道乃回軍屯北沙糧且絕與賊死戰七晝夜賊敗走
奪船七十餘砦得渡淮保泗州時方暑兩湖水溢諸營皆避去
搏霄獨守孤城賊環攻數十里搏霄坐城上遣偏將以騎士由

西門突出賊後約曰旗一揮卽還旣而旗動騎士還步卒出城夾擊賊大劓乃結陣西行轉戰數十合軍至海寧朝廷嘉其功命同僉淮南行樞密院事擢霄建議於朝曰淮安爲南北襟喉江淮要害其地一失兩淮皆未易保爲今日計莫若於黃河上下并瀕淮海地及南自沐陽北抵沂莒輒榆諸州縣布連珠營每三十里設一總砦就三十里中設一小砦使斥堠烽燧相望遇賊則并力野戰無事則屯種而食然後進有援退有守又海寧一境不通舟楫軍糧惟可陸輓民不勝其瘁權令軍人搬運其陸運之方每人行十步三十六人可行一里三千六百人可行百里每人負米四斗以夾布囊盛之用印封識人不息肩米不著地排列成行日行五百回計路二十八里輕行一十四里重行一十四里日可運米二百石人給米一升可供二萬人此

百里一日運糧之術也又言江淮南北之民壯者既盡爲軍老
弱無所依歸者宜置軍民防禦使釋軍官材堪牧守者居之而
籍其民以屯故地於以練兵積穀且耕且戰內全山東完固之
邦外捍淮海出沒之寇而後恢復可圖也時不能用十七年妖
寇劉福通遣僞將毛貴陷益都般陽諸路有旨命搏霄從知院
事卜蘭奚往援濟南適告急搏霄提兵往濟南賊衆自南山來
攻堊之兩山皆赤搏霄先以數十騎挑之賊衆悉來鬪騎少卻
至澗上伏兵起遂合戰城中兵亦出大破之般陽賊復踰南山
來襲濟南搏霄列兵城上弗爲動賊夜攻南門以矢石禦之黎
明乃密開東門遣兵出賊後既旦城上兵皆下大開南門合擊
賊敗走濟南始寧改淮南行樞密院副使兼山東宣慰使都元
帥有嫉其功者譖於總兵太尉紐的該令搏霄仍依前詔從卜

蘭奚征益都搏霄卽出濟南城屬老且病請以弟昂霄代領其衆朝廷授昂霄淮南行院判官十八年正月毛貴陷滄州京師大恐急檄搏霄守河間長蘆鎮以兵北行且曰我去濟南必不保旣而果陷搏霄方駐兵南皮適有旨擢河南右丞甫拜命毛貴兵至營壘猶未完諸將請曰賊至當奈何搏霄曰我受命至此惟以死報國方拔劍督戰賊衆突至捽而前刺殺之無血但見白氣衝天是日昂霄亦死帝深加悼惜追封搏霄魏國公諡忠定昂霄隴西郡侯諡忠毅

冊曰料無不中向無不摧文武兼備實爲全才倘值隆平爲周爲名豈獨大節爲萬世表

王英字邦傑益都人性剛果有大節膂力絕人襲父職爲莒州翼千戶父子皆善雙刀號刀王世祖至元二十九年江西行院

命往南雄討丘太老等成宗元貞初從左丞董士選討山西劉
貫所至皆有功歷官同知海北海南道宣慰司事後至元初漳
州李志甫潮州劉虎仔並起爲亂時英已致仕平章伯撒里謂
僚佐曰是非刀王行不可其人可以義激遣使迎致之英曰國
家有事吾雖老其可坐視乎據鞍橫槊精神飛動馳赴焉及賊
平英功居首至正中毛貴陷益都英時年九十六顧謂其子弘
曰我世受國恩美官厚祿備嘗享之今老矣縱不能事戎馬以
報天子尚忍食異姓之粟以求生乎水漿不入口者數日遂卒
貴聞之使具棺衾以葬將歛舉其尸不動焚香祝曰公子弘請
公歸葬先塋祝畢尸遂起憲司請卹於朝曰不食寇粟餓死芹
泉有夷齊之風爲臣之清者也

芹泉谷名
英所居也

顏瑜字德潤曲阜人充國復聖公五十七代孫也以行誼舉爲

陽曲縣教諭至正十八年義兵萬戶田豐叛陷東平瑜攜家走
鄆城道遇賊曰爾何人曰我東魯書生也賊曰爾書生可從見
主帥瑜曰賊爾何主帥邪賊怒欲殺之瑜無懼色復使之寫旗
瑜大詬曰爾本大元百姓會世亂募爾爲兵而反行叛逆我腕
可斷豈能爲爾寫旗從逆乎賊以槍刺殺之妻子皆爲所害
有曹彥可者亳州人當妖寇起里中無賴子倡亂揭帛於竿羣
趨彥可家劫之使寫旗彥可辭乃迫以刃彥可唾曰我儒者惟
知有君父豈爲汝寫旗者賊怒遂見殺

鄭玉字子美徽州歙縣人幼敏悟嗜學旣長覃思六經尤邃於
春秋絕意仕進門人受業者衆所居至不能容相與卽其地構
師山書院處焉至正十四年除翰林待制朝廷遣使以御酒名
幣浮海徵之辭曰名爵者祖宗所遺使與天下賢者共之待制

之職臣非其才不敢受酒與幣臣不敢辭也家居日以著書爲樂有春秋經傳闕疑三十卷其序曰夫子集群聖之大成春秋見夫子之大用其於事也可以因則因可以革則革其於人也可以褒則褒可以貶則貶故易詩書言其理春秋載其事有易詩書而無春秋則徒託之空言而已矣然在當時游夏已不能贊一辭至於三家之傳左氏雖若詳於事其失也誇公穀雖或明於理其失也鄙及觀其著作之意則若故爲異同之辭而非有一定不可易之說兩漢專門名家之學則又泥於災祥徵應而不知經之大用唐宋諸儒人自爲說家自爲書紛如聚訟互有得失程子雖得經之本旨惜無全書朱子間論事之是非又無著述爲今之計宜博采諸儒之論發明聖人之旨經有殘缺則考諸傳以補其遺傳有舛訛則稽諸經以證其謬使經之大

指粲然復明於世昭百王之大法開萬世之太平然後足以盡
斯經之用某不自揆嘗因朱子通鑑綱目之例以經爲綱大字
揭之於上復以傳爲目而小字疏之於下敘事則專左氏而附
以公穀合於經者存之立論則先公穀而參以歷代諸儒之說
合於理者取之其或經有脫誤無從質證則寧闕之以俟知者
而不敢強爲訓解傳有不同無所考據則寧兩存之而不敢妄
爲去取至於誅伐之事尤不敢輕信傳文曲相傳會蓋春秋有
魯史之舊文有聖人之特筆固不可字求其義如酷吏之刑書
亦不可謂全無其義如史官之實錄也程子謂春秋大義數十
炳如日星豈無可明之義朱子謂起頭一句春王正月便不可
解固有當闕之疑是書折衷二說而爲之義例所以辭語重複
不避繁蕪者蓋以常人之心窺聖人之意反復推詳猶懼不得

其要况敢吝於言乎然亦姑以便檢閱備遺亡而已非敢爲明

經旨傳後世也

見經義攷

十七年明兵入徽州守將要之使出玉曰

吾知死期至矣二婢入吾室其兆也遂奮身往見守將曰君臣

之六義生死之大關天壤間自有一定吾豈事二姓者哉被拘

久之親朋每攜具至則從容盡歡且告以必死狀妻程氏聞之

使語曰君苟死吾其相從地下矣玉使謂曰若果從吾復何憾

明日具衣冠北向再拜自縊于旅舍計至程亦自經鄉人卽其

師山書院改廟祀焉

新安志云歙人鄭千齡妻洪氏年二十六而寡始終貞白子二長曰玉次曰璿玉死

節妻程亦死之妾何矢志撫其孤璿早卒妻玉亦不二志至今稱鄭門四節

福壽唐兀氏早歲知書善辭令入備環衛用年勞授長寧寺少

卿累遷同知樞密院事潁州告變時車駕在上都廷議欲驛奏

以待命福壽謂比似得請還則事有弗及決計且調兵遣官討

之而後聞順帝善其處置得宜命平章淮南行省事是時濠泗已陷上游賊勢甚盛福壽築石頭斷江面守禦有方衆恃以爲固至正十五年遷南臺御史大夫守集慶先是集慶嘗有警湖廣平章阿魯灰將苗軍來援事平苗軍殺阿魯灰以叛集慶之援遂絕及高郵廬和等州相繼陷集慶勢益孤且倉庫無積蓄福壽因下令富民俾出助糧餉激厲士衆爲完守計十六年三月明兵圍集慶福壽數督戰盡閉諸城門惟開東門以通出入城中勢不支遂破百司奔潰福壽獨坐鳳凰臺下指麾左右或勸之去叱曰吾爲國家重臣城存則生城破則死尚安往哉達魯花赤達尼達思見其獨坐意若有所爲者留弗去俄而亂兵四集福壽遂遇害達尼達思亦死之同時死者有治書侍御史賀方字伯京管寧人以文學名事聞贈福壽衛國公諡忠肅

石抹宜孫字申之

世系見石抹也先傳

父繼祖爲沿海上副萬戶鎮台州

仁宗初移鎮婺處兩州馭軍嚴肅爲學本經術兼通名法縱橫

天文地理術數方技釋老之說見稱薦紳間宜孫承其家學長

於詩歌嘗以廕襲父職守處州及弟厚孫長卽讓其職退居天

台方國珍起海上行省檄宜孫守溫州卽起任事屢平賊築城

爲禦敵計至正十七年行省丞相達識帖睦爾承制授宜孫行

樞密判官分院治處州以劉基爲其院經歷蘓交龍爲照磨宜

孫又辟郡人胡深葉琛章溢參謀軍事處居萬山中盜賊憑據

險阻輒竊發不易治宜孫用基等謀或擣以兵或誘以計未幾

皆殲殄無遺尋遷同僉行院事值天下多故所在守將各自相

保於時浙東則宜孫在處州邁里古思在紹興皆賊所畏憚者

次年明兵取蘭溪且逼婺州宜孫母實在婺泣曰義莫重於君

親食祿而不事其事是無君也母在難而不赴是無親也卽遣
胡深等將民兵數萬赴援親率精銳爲之殿北至發收續明兵
入處州宜孫將數十騎走福建境上欲圖恢復所至人心已散
知事不可爲嘆曰處州吾所守者今吾勢已窮無所於往不如
仍還處境長作處州鬼耳旣還至慶元縣爲亂兵所殺追贈越
國公諡忠愍 邁里古思字善卿西夏人至正十四年進士及
第授紹興路錄事司達魯花赤苗軍帥楊完者在杭縱軍鈔掠
至紹興奪人馬邁里古思收斬數人完者懼不敢調兵渡浙會
沙行臺僑治紹興檄邁里古思爲行臺鎮撫乃大募兵號果
毅軍處州山寇焚掠發境卽約石抹宜孫夾攻其巢穴平之省
臣達識帖睦爾承制授行樞密判官分院治紹興方國珍遣兵
侵據屬邑邁里古思曰國珍本海賊今旣降爲大官而復來害

吾民可乎欲率兵往問罪先遣部將黃中取上虞時朝廷方倚國珍資其舟運糧而御史大夫拜住哥與國珍素通賄情好甚厚憤邁里古思擅舉兵且恐生變偽使人召至私第與計事至則命左右以鐵鎚搥殺之斷其頭擲厠洞中黃中間變卽率衆復讐盡殺拜住哥家屬及臺府官掾史獨留拜住哥不殺御史真童糾其陰害帥臣幾致激變於是詔削官職安置潮州而邁里古思之寃始白

名賢錄云潮州董旭字太初素與邁里古思友善及被難旭作詩傷悼辭極哀楚方國珍

欲羅致幕下旭拒不受乃賦詩曰鬱鬱芒碭雲未辨蛟龍形災英祥星光未燭夾馬營君子慎其微草露不可行屢強之不屈遂遇害有能生者上虞人也當邁里古思守郡時生聚鄉兵出應與國珍戰曹娥江身死瘞江岸後岸皆衝嚙冢至今獨完

普顏不花字希古蒙古人偶儻有大志由國子生登至正五年

右榜進士第一授翰林修撰遷江西行省郎中徐壽輝寇江西

普顏不花戰守之功爲多

語在道童傳

累轉中書參知政事十八年

詔與泊書侍御史李國鳳經略江南至建寧陳友諒遣賊鄧克明來寇時國鳳分鎮延平聞變夜遁普顏不花曰我承制來此去將何之誓與此城同存亡耳前後拒戰六十日賊不得逞明年召還授山東宣慰使守益都明兵壓境捍城力戰城陷普顏不花還告其母曰兒忠孝不能兩全有二弟當爲終養拜母趨官舍坐堂上敵素聞其賢名之再三不往旣而面縛之厲聲曰我元朝進士官至極品臣各爲其主何以生爲竟不屈死其妻阿魯真呼家人告曰我受恩封齊國夫人今事至此唯有死耳已而普顏不花二弟之妻各抱幼子及婢妾溺舍南井死比阿魯真欲下井塹塞不可容遂抱子投舍北井其女及妾女孫女皆隨溺焉是時有申榮者官山東行省平章守東昌見列郡皆降告其父曰人生世間不能全忠孝者見也城中兵少不敵

戰則萬人之命由兒而喪但有一死報國耳遂自經

喬彛字仲常號芸齋晉寧人性高介有守至正十八年叛將王士誠襲晉寧城陷城中死者過半彛家有大井乃整冠衣坐井上令妻子婢輩循次投井中而已隨赴之士誠素知彛名使人卽其家邀致之至則死矣賊平賜諡純潔 有張崑起字傳霖汾州人嘗爲國子助教免歸盜自晉寧陷汾州崑起與妻赴井死 王佐字元輔晉寧人賊至爲所獲欲降之佐傲岸自如詬賊不輟因見害 又有吳德新者字止善建昌人工醫留京師偶往晉寧會盜至見執脅使降不從賊加刃頸上德新罵不已乃曳之井上陽欲擠之德新卽自投井中仰罵賊賊下射矢貫其頂罵益力賊怒以土埋井而去

楊樸字文素河南人早有文名得推擇試吏事爲全椒縣尹行

省參政也先總兵于滁縱飲不理軍事至暮城門不鑰土寇入縱火正張燭揮杯急踰城走樸度必死盡殺其妻女朝服坐堂上寇欲奉爲主樸指妻女示曰我已戕我屬政欲死官守耳尚何云哉連唾之寇繫樸樹上刳其肉殆盡

栢帖穆爾字君壽蒙古人至正中累遷福建行省郎中治福州

以廉能著聲

名山藏云僉樞密院居侯官

二十七年明舟師由海道趣閩奄

至城下栢帖穆爾知城不可守引妻妾坐樓上慷慨謂曰丈夫死國婦人死夫義也今城且陷吾必死於是若等能從吾否皆泣曰無他志相對而縊者六人有十歲女度其不能自死因給之曰汝稽顙拜天庶保我無恙甫拜卽挈米囊壓死之乳媼抱其幼子旁立以泣栢帖穆爾熟視之嘆曰父死國母死夫妾與女從父者也皆當死汝三歲兒於義何所從乎爲宗祀計可也

乃令媼抱匿旁近民舍而歛金珠畀之曰脫有急可以此贖命有頃兵入城卽舉燈自燃四圍窓火大發自焚死

冊曰臣固死忠名義所在妻孥而下義亦稍殺矢志不回無兒女態節烈同垂千秋不壞

達里彌實字子初回鶻人性剛介事母至孝年四十猶不仕或問之曰吾不忍舍母去以宿衛年勞遷監察御史至正十七年建言疆宇日蹙兵律不嚴陝西汴梁淮潁山東之寇有窺伺燕趙之心宜急選將練兵信賞必罰共圖克復之宜預定守禦之策不報出爲漳州路達魯花赤明兵旣取福州興泉相繼納欵迭里彌實仰天嘆曰吾不材位三品國恩厚矣報國者惟有死耳亡何吏走白招諭使者至請出城迓之答曰爾第往吾行出矣乃詣廳事具公服北面再拜畢引斧砍其印大書手版曰大

元臣子卽入坐拔所佩刀刺喉旣死猶手執刀按膝坐儼然如生郡民歛其尸葬東門外 時有獲獨步丁者亦回鶻人官廣東廉訪僉事有呂復者爲江西行省都事皆寓福州而復以行省命攝長樂縣事福州旣下獲獨步丁曰吾兄弟三人皆忝進士受國恩四十年今雖無官守然大節所在不可辱以石自繫其腰投井死復亦曰吾世食君祿今雖攝官若不以死報國則無以見先人於地下乃引繩自經獲獨步丁兄曰穆魯丁者官建康曰海魯丁者官信州先是亦皆死國難云

閔本字宗先河內人性剛正早歲貧刻志於學推擇爲禮部令史由御史臺掾五轉至集賢侍講學士本素有目青嘗上章乞謝政不允明兵薄京城本謂其妻程氏曰國事至此吾知之久矣愧不能立功補報敢愛六尺軀苟活哉程曰君能死忠我尚

有愛於君乎本乃朝服與程氏北向再拜大書其職銜姓名于
屋壁遂各縊焉二女長真真次女女亦號泣自縊于其側

拜住字問善康里人由國學生以材累官翰林國史院都事爲
太子司經明兵至拜住謂家人曰吾始祖海藍伯封河東郡公
者與太祖同事克烈部可汗太祖滅克烈吾祖不忍改所事避
於遠地以沒吾祖生朔漠尚守義如此今吾生長中原讀書國
學可不知大義乎况吾累世受國厚恩今其國破安忍見之從
容赴井死

粵志載有商要千戶亦名拜住嶺西寇至挺身
出戰爲亂槍所橫腹而死郡中至今祀之

趙弘毅字仁卿真定晉州人少好學家貧無書備於巨室晝則
爲役夜則借書讀之始辟爲翰林書寫再轉爲大樂署令明兵
入京城弘毅嘆曰忠臣不二君烈女不二夫古語也我今力不
能救社稷但有一死以報國乃與妻解氏皆自縊其子恭爲中

書管勾與妻子訣曰今乘輿北奔吾父子世食祿不能効尺寸
況吾父母已死尚何顧惜或止之曰我曹官卑何自苦如此恭
叱曰爾非吾徒也古者忠義人各盡自心豈問職之崇卑乎遂
北向再拜縊死其女官奴年十七見恭死方大泣適隣嫗數輩
來相率出避曰我未適人避將何之人生在世便百歲亦須一
死乃入中堂解衣帶自經

黃俾字殷士撫州金谿人博學明經尤長於詩賦至正十七年
用丞相太平薦授淮南行省照磨歷官國子監丞改翰林待制
兼國史院編修官二十八年京城既破俾歎曰我以儒致身累
蒙國恩爲胄子師代言禁林今縱不我戮何面目見天下士乎
遂赴井死有詩文傳於世是時有張庸者字存中真定人後
家溫州精太乙數遭世亂以策干進經畧使李國鳳奇之及赴

京進太乙數圖歷官刑部尚書領團練守房山駱駝谷會諸寨
皆降遣從事段禎求援不報寨民執庸出見主將庸不屈與禎
同見殺

王遜志字文敏

志作

衛州汲縣人翰林學士惲之曾孫也以廕

授侍儀司通事舍人由監察御史出爲江西廉訪副使召僉太

常禮儀院事明兵逼京師有旨命陳祖仁及遜志載太廟神主

從皇太子北行遜志執不可

語載陳祖仁傳

京城不守公卿爭出降遜

志獨家居正衣冠而坐其友中政院判官王翼

一作統志

來告曰

新朝寬大盍出詣官自言狀遜志斥之曰君旣自不忠又誘人
爲不義邪因戒其子曰汝謹繼吾宗卽日投居賢坊井死

冊曰育賢養士幾及百年一旦國破累累生捐豈日仰報
豈爲名傳不負所學君臣義全

張正蒙山陰人嘗以吏爲湖州德清稅務提領母喪廬墓南紹

興兵變正蒙謂妻韓氏曰吾曾爲元朝臣子於義當死韓曰君

果死忠吾必死節遂相對自縊其女池奴年十七泣曰父母旣

死吾獨何生隨投身深崖中

志云次女越奴日匿山中夜守戶側竟餓死

徐祿頭大都人明兵入都城妻岳氏告曰寇至我等恐被驅迫

將奈何祿頭曰事急矣惟有死爾遂火其所居夫婦挽手同投

烈焰中母王氏及二女一子見之號慟不已亦皆抱持赴火死

梧溪集云至正十一年盜竄起二月山東副都元帥禿堅里師

出鄒平縣中流矢死廣州推官王宗顯香山巡檢曾元吉石岐

戰死五月徐州兵馬指揮使禿魯亳州陷陣死廣德翼萬戶關

仕百塘洋赴水死汴梁路同知黃頭項城縣被執罵賊死時尚

乘卿那海戌項城語子伯忽都姪阿刺不花曰彼賊新執黃頭

勢耶甚與其待敵孰若進討苟天未厭亂吾一門不忝卜尚書

矣衆曰大人誓許國兒輩何愛死遂進攻多所斬獲卒以援絕

皆拔刀自刎七月廣東奏差發兒率白徒拒周塘或勸之走發

日祿位無小大見危則致命亦死之封川吏目唐國寶被俘遭

並死安東萬戶朶哥千戶高安童並中賊死額水沿海百戶尹

賣山窮象

卷三十八

言

旌德二

宗澤戰死黃巖九月汝寧知府完哲府判福祿護國連抗賊比
城陷仰天呼曰臣等義不辱並投濠死西城司副使增海守徐
州轉戰死東壁刺場嶺義兵千戶宋如玉迎敵死大嶺總管李
季先兵敗死新州雅州司吏劉處岩巷戰死南市宣徽院使帖
木兒河南萬戶察罕相繼廕戰死南陽臥龍崗下權香山巡檢
張德興以不從叛亦死十二月浮梁知州曹觀當徽寇入城率
義壯逆戰死袁州推官蔡延秀斬寇入犯被執不屈死鎮江上
萬戶丑厮奉宣讓王令移守安慶前後出師凡二十九捷輕舟
追賊夜中鎗死次年三月昌國州達魯花赤高昌帖木兒海寇
突犯境募兵督戰眾寡不敵慨然嬰城死明兵至杭州徵故官
監郡閻元賓嘆曰國危身辱尚有頭戴南冠邪一夕雉頭死
石初集云至正十五年紅巾寇悉銳攻安城州人姚正叔麾義
旗力戰眾踴躍求自効監州普刺忌其能力過之正叔奮起擊
賊城陷姚氏一門三世無存者寇至廬陵鄉人戴大賓提義旅
數千眾扼龍泉要衝相持累月竟死于寇有龍泉布
衣章立賢父子婦姑盡室投江死皆吉州儒者云

冊曰忠孝節義咸具於性天寶命之寧關學問草莽一介
就死從容大共之理有生所同